

原

富

序

嚴子既譯亞丹氏所著計學書。名之曰原富。俾汝給序之。亞丹氏是書歐美傳習已久。吾國未之前聞。嚴子之譯。不可以已也。蓋國無時而不需財。而危敗之後爲尤急。國之庶政。非財不立。國不可一日而無政。則財不可一日而不周所用。故曰國無時而不需財。及至危敗。財必大耗。欲振厲國存。雖財已耗。慮不能不用。故曰危敗之後尤急。中國士大夫。以言利爲諱。又伏習於重農抑商之說。於是生財之途常隘。用財之數常多。而財之出於天地之間。往往遺棄而不理。吾棄財不理。則人之視其旁者。勢必攘臂而并爭。於是財非其財。吾棄財不理。而不給於用。則仍取給於隘生之途。途益隘而取益盡。於是上下交瘁。而國非其國。財非其財。國非其國。則危敗之形立見。危敗之形見而不思變計。則相與束手熟觀而無如何。思變矣而不得所以變之方。雖終日拍攘傍徨交走騷愕。而卒無分毫之益。中國自周漢到今。傳所稱理財之方。其高者則節用而已耳。下乃奪民財以益國用而已耳。奪民財以益國用。前所謂

取給於隘生之途是矣。此自瘠之術也。節用之說。施之安甯之世。能使百政廢缺不舉。而財聚留於不用之地。施之危敗之後。則節無可節。廢缺者不舉。而亦無可聚留。循是不變。是坐自困也。所爲變之之方者。何也。取財之出於天地之間者。條而理之。使不遺棄而已矣。取財之出於天地之間者。條而理之。使不遺棄。非必奇材異智而後能也。然而不痛改諱言利之習。不力破重農抑商之故見。則財且遺棄於不知。人安得而就理。是何也。以利爲諱。則無理財之學。重農抑商。則財之可理者少。夫商者。財之所以通也。農者。生財之一途也。閉財之多途。使出於一所。謂隘也。其勢常處於不足。尙何通之可言。古之生財之途博矣。博而不通。則壅。故商興焉。禹之始治水也。既與益稷。予衆庶稻。及他糧食矣。又謂有餘。補不足。懲遷化。居以通之。是商與農並興驗也。專農一途。故不需商也。禹於九州田賦。既等而次之。至其貢篚。則皆所鮮所多。相通易之物。凡敗之所蠲。漁之所獲。虞之所出。工之所作。升人之所職。舉財之出於天地之間者。無不財取爲用。夫是故勸商。其每州之終。必紀諸水。毋輸則皆商旅。

所以通之路也。是安有重農抑商之謬論乎。禹之理天下之財至纖悉不專農如此而升利尤遠。蓋荊揚之金三品至周而猶盛。故詩曰大路南金。及漢武而後乃稍衰歟。史公有言。豫章黃金取之不足更費其體也。然上溯神禹時已二千年矣。禹之興升利如此。又據九州水道推論之。使神禹生今時。其從事於今之路礦可意決也。況乃處危敗之後。則若用宣之考室。衛文之通商。惠工。跡牝三千。蓋皆奉神禹爲師法。而可以利爲後而諱言之乎。今國家方修新政。而苦財賂衰耗。說者顧謂五洲萬國我爲最富。是實非吾患也。而嚴子之書適成於是時。此亞丹氏言利之書也。顧時若不滿於商。要非吾國抑商之說。故表而辨明之。世之君子。倘有取於西國計學家之言乎。則亞丹氏之說具在。倘有取於中國之舊聞乎。則下走所陳尙幾通人財幸焉。

光緒辛丑十一月桐城吳汝綸

斯密亞丹傳

斯密亞丹者。斯密其氏。亞丹其名。蘇格蘭之噶谷邸人也。父業律師。爲其地監權。死逾月而亞丹生。母守志不再醮。撫遺腹甚有慈恩。卒享大年。親見其子成大名。而亞丹亦孝愛終其身。不娶婦。門以內。雍雍如也。亞丹生而羸弱。甫三歲。避外家。爲埃及流句所擄。尋而復歸。入里小塾。學書計。十四進格拉斯高鄉學。十八而爲巴列窩選生。資以廩餼。入英之鄂斯福國學。當十七棋中葉。英國國論最洽。教宗演事上無犯之旨。凡後此所嚴爲立政憲法者。皆以謂叛上喪天之邪說而斥之。韓諾華氏新人英爲王。英前王雅各黨人。潛聚其中。陰謀所以反政者。以故國學師資麻息。章則放紛。斯密遊於其間。獨盡忠筆墨。沈酣典籍。居之六年。而學術之基以立。既卒業。居額丁白拉。以辭令之學授徒。一時北部名流。多集館下。於是而交休蒙大關。休蒙大關者。以哲學而兼史家。爲三百年新學鉅子。斯密與深相結。交久而情益親。繼而主格拉斯高名學講習。其明年。改主德行學。又時時以計學要義演說教人。蓋斯密平生

著作傳者僅十餘種。原富最善。德性論次之。皆於此時肇其始矣。一千七百六十六年。有公喬拔古魯者。挾斯密以遊歐洲。居法國者三十閱月。法人爲自然學會。會中人皆名宿。而休蒙適副英使居巴黎。則介斯密遊其曹偶。遂與拓爾古。格斯尼。摩禮。利。章。皆莫逆爲摯交。而斯密之見聞。乃益進。當是時。歐洲民生蒸蒸日上。大變將作。法國外則東失印度。西喪北美。內則財賦竭虛。政俗大壞。華盛頓起而與英爭自立。兩洲騷然。自由平等之義。所在大昌。民處困阨之中。求其故而不得。則相與歸獄於古制。有讓之徒。於政治宗教。咸有論著。斯密生於此時。具深湛之思。值變化之會。故原富有作。雖曰其人賤。知抑亦時之所相也。歸里杜門十年。而原富行於世。書出。各國傳譯。言計之家。俱爾宗之。而同時英宰相弼德。於其學尤服膺。欲採其言。盡變英之財政。適與拿破侖相抗。兵連軍興。重未暇及也。然而他愛爾蘭入口之禁。與法人更定條約。平其酒權。不相齟齬。則皆斯密氏之畫云。夫兵者國之賊。而變法與民更始。非四封無警。尤不行。北美自立。英國債之積已多。迫連普魯士以抗。破命。海陸空

德新英人無釋負之一日矣。顧英國負雖重而蓋藏則豐。至今之日。其宜貧而反富強者。夫非括領窮門。任民自由之效歟。則甚矣。道之無負於人國也。居久之斯密爲格拉斯高國學祭酒。年六十四矣。逾三年死。葬於額丁白拉剛美門之某園。斯密於學廬所不窺。少具大志。欲取經世之要而一理之道。遠命促。僅竟其二。德性論言風俗之所以成。其與同時哲學家異者。諸家言群道起於自然。德性論則起於人心之相感。性世弟。人樂與親。與人言論。不爲發端。俟有所起而後摩之。機牙周給。賢記多聞。舉座驚歎。燕居好深湛之思。當其獨往。耳目殆廢。家本中貧。以學自饒。然勇於用。值盡耗其產。死日獨餘舊書。以畀其外弟。費格拉斯云。

譯史氏曰。德人最重汗德心學。見諸生民未有。必求其配。無已其原富乎。夫二書解旨。奧顯絕殊。而德人稱之。願若此。或曰。斯密之避法也。去革命之起無幾時。然於事前未聞一論及之。此以云先幾之識。殆未然歟。嗟夫。此以見斯密之不有。而立言之有法也。夫妄健一國之變。雖庸夫僂爲之中。以邀名。不中無補。獨至知言之士。一言

之發將使可復彼甯默然者知因緣至繁無由施其內蘊之術故也不然據既然之
迹推必至之勢理財禁民之際一私之用則禍害從之執因而窮果以斯術處此猶
略人之於交食良醫之於死生夫何難哉雖然吾讀其書見斯術自詭其言之見用
也則期諸烏託邦其論四民之愛國也則首農而黜商賈願死未三十年大通商政
行之者不獨一英國也而死守家律聯田主以族拒執政乃農而非商也事之未形
其變之不可知如此雖在聖智有時而然然則後之論世變者可不謹其所發也哉
可不謹其所發也哉

譯事例言

計學四名英科諸密本希臘語業科此言家計密爲希臘之轉此言治言計則其義始於治家引而申之爲凡科量經紀撙節川納之事擴而充之爲邦國天下生食爲用之經蓋其訓之所苞至衆故日本譯之以經濟中國譯之以理財顧必求脗合則經濟既嫌太廓而理財又爲過隘自我作故乃以計學當之雖計之爲義不止於地官之所掌平準之所書然考往籍會計計相計借諸語與常俗國計家計之稱似與希臘之希臘較爲有合故原富者計學之舊也

然則何不徑稱計學而名原富曰從斯密氏之所自名也且其舊體例亦與後人所撰計學稍有不同適用多於明體一也匡謬急於購學二也其中所論如部內之篇二篇三部戊之篇五皆旁羅之言於計學所涉者寡尤不得以科學家言例之云原富者所以察究財利之性情實富之因果者國財所由出云爾故原富者計學之書而非廣計學者之正法也

計學創於斯密此阿好者之言也夫財賦不爲專學其散見於各家之著述者無
論已中國自三古以還若大學若周官若管子孟子若史記之平準書貨殖列傳漢
書之食貨志相見之豐鐵論降至唐之杜佑宋之王安石雖未立本幹但條發其不
得關於理財之義無所發明至於海西則希臘羅馬代有專家而斯密氏所繼承之
師友若庚智命若特嘉爾若圖華尼若休谿大關若哈哲孫若洛克若蒲特斯坦若
麥庚斯若柏樞其言論譬喻皆散見於本書而所標重農之旨大抵法國自然學會
之所演者凡此皆大彰著者也獨其詳焉而稍詳焉而詳事必有微理無隱設而文
章之妙喻均智頑則自有此書而後世知食貨爲專科之學此所以見推宗匠而爲
新學之開山也

計學於科學爲內緒之屬內緒者馴化轉變見其會通立爲公例者也如斯密理嘉
圖穆勒父子之所論者皆屬此類然至近世如耶方斯馬夏律諸書則漸入外緒爲
微積曲線之可推而其理乃益密此二百年來計學之大進步也故計學微類全豹

於斯密原富而外。若穆勒、倭克爾、馬夏律三家之作。皆宜逐譯。乃有以盡此學之源流。而無後時之歎。此則不佞所有志未逮者。後生可畏。知必有廣續而成之者矣。計學以近代爲精密。乃不佞獨有取於是書。而以爲先事者。蓋溫故知新之義。一也。其中所指斥當軸之迷謬。多吾國言財政者之所同然。所謂從其後而鞭之二也。其書於歐亞二洲。始通之情勢。英法諸國。舊日所用之典章。多所纂引。足資考鏡。三也。標一公理。則必有事實爲之證驗。不若他書。勃率理窟。潔淨精微。不便淺學。四也。理在目前。而未及其時。雖賢哲有所不見。今如以金爲財。二百年以往。泰西幾無人不。然。自斯密出。始知其物爲百貨之一。如博進之籌。取前民用。無可獨珍。此自今日觀之。若無甚高之論。難明之理者。然使吾輩生於往日。未必不隨俗作見。並爲一談也。試觀中國道咸間。計臣之所論議施行。與今日朝士之言通商。可以悟矣。是故一理既明之後。若揭日月而行。而當長夜漫漫。習非勝是之日。則必知幾之神。曠世之識。而後與之。此不獨理財之一事然也。

由於以金爲財。故論通商。則必爭進出差之正負。既斷斷於進出差之正負。則商約隨地皆荊棘矣。極力以求抵制之術。甚者或以興戎。而不悟國之貧富。不關在此。此亦亞東言富強者所人人皆墜之雲霧。而斯密能獨醒於二百年以往。此其所以爲難能也。

爭進出差之正負。斯保商之政。優內抑外之術。如雲而起。夫保商之力。昔有過於英國者乎。有外輸之獎。有挈還之稅。有海運之條例。凡此皆爲抵制設也。而卒之英。不以是而加富。且延緣而失美洲。自斯密論出。乃商賈亦知此類之政。名曰保之。實則困之。雖有一時一家之獲。而一國長久之利。所失滋多。於是翕然反之。而主客交利。今夫理之誠妄。不可以口舌爭也。其證存乎事實。歌白尼奈端之言。天運其說所不可復搖者。以可坐致數千萬年過去未來之躔度。而無杪忽之差也。斯密計學之例。所以無可致疑者。亦以與之冥同則利。與之外馳則害故耳。

保商專利諸政。既非大公至正之規。而又足沮遏國中商業之發達。是以言計者群

然非之、非之誠是也。然既行之後，欲與更張，則其事又不可以不謹。蓋人心浮動，而身被之者，常有不可追之災故也。已寘母本，不可復收，一也。事已成習，不可猝改，二也。故變法之際，無論舊法之何等，非計新政之如何利民，皆其令朝頒民夕，狼顧其目前之耗失，有萬萬無可解免者。此變法之所以難，而維新之所以多流血也。悲夫！言之緣物而發者，非其至也。是以知言者慎之。斯密此書論及商賈，輒有疾首蹙額之思。後人釋私平意觀之，每覺所言之過。然亦知斯密時之商賈，爲何等商賈乎？稅關屯棧者，公司之利也。彼以謀而沮其成，陰嚙七年之戰，戰費既重，而印度公司，所以待以樁柱其業者，又不訾。事轉相因，於是乎有北美之戰。此其害於外者也。選議員則購推舉，議權稅則賂當軸，大壞英國之法度。此其害於內者也。此曹顧利否耳？何嘗恤國家乎？又何怪斯密言之之痛也。雖然，此緣物之論也。緣物之論，所持之理，恒非大公，世異情遷，則其言常過。學者守而不化，害亦從之。故緣物之論，爲一時之奏，割可爲一時之報章可，而以爲科學所明之理，必不可。科學所明者，公例，公例必無

時而不誠

斯密於同時國事所最爲剽擊而不遺餘力者無過印度之英公司此自今日觀之若無所過人者顧當其時則英公司之煒赫極矣其事爲開關以來所未曾有以數十百處汚逐利之商旅際蒙兀之積弱印民之內訌克來福一豎子耳不數年間取數百萬里之版圖大與中國並者據而有之此亞烈山大所不能爲羅馬安敦所不能致而成吉思汗所圖之而無以善後者也其慙駭震耀各國之觀聽者爲何如乎願自斯密視之其駟非駟馬非馬上焉旣不能臨民以爲政下之又不足懋遷而化居以言其政令則魚肉身毒之民以言其龍斷則侵欺本國之衆徒爲大盜何裨人倫惟其道存故無所屈賢哲之言論夫豈簪於一時功利之見而爲依阿也哉嗚呼賢已

然而猶有以斯密氏此書爲純於功利之說者以謂如計學家言則人道計虛虛虜將無往而不出於喻利馴致其效天理將亡此其爲言厲矣獨不知科學之事主於

所明之誠妄而已。其合於仁義與否。非所容心也。且其所言者。計也。固將非計不言。抑非曰大道止於爲計。乃已足也。從而尤之。此何異讀兵謀之書。而訾其伐國。視餓殍之論。而怪其傷人乎。且吾聞斯密氏少日之言矣。曰。今夫群之所以成群。未必皆善者機也。飲食男女。凡斯人之大欲。即群道之四維。缺一不行。群道乃廢。禮樂之所以興。生養之所以遂。始於耕鑿。終於懋遷。出於爲人者寡。出於自爲者多。積私以爲公。世之所以盛也。此其言。藉令裂衣大袒者聞之。不尤掩耳而疾走乎。則無怪斯密他日之悔其前論。戒學者以其意之已遷。而欲廢其講義也。

原富本文。排本已多。此譯所用。乃鄂斯福國學頒行新本。羅哲斯所輯圖者。羅亦計學家。著英倫麥價考。號翔臚。多發前人所未發者。其於是書。多所注釋匡訂。今錄其善者附譯之。以爲後案。不佞聞亦難取他家之說。參合已見。以相發明。溫故知新。取與好學深思者。備揚權討論之資云爾。

是譯與天演論不同。下筆之頃。雖於全節文理。不能不融會貫通爲之。然於辭義之

間無所俱到。於益獨於首部篇十一釋租之後。原書旁論四百年以來銀市騰跌。文多繁贅。而無關宏旨。則概括要義譯之。其他如部丁篇三首段之末。專言荷京版克以與今制不同。而所言多當時瑣節。則刪置之。又部甲後。有新密及羅哲斯所附一千二百二年至一千八百二十九年之倫敦麥價表。亦從刪削。又此譯所附中西編年及地名人名物義諸表。則張菊生比部。鄭稚辛孝廉。於編訂之餘。列爲數種。以便學者考訂者也。

夫計學者。切而言之。則關於中國之貧富。遠而論之。則係乎黃種之盛衰。故不佞每見斯密之言。於時事有關合者。或於己意有所根據。輒爲案論。丁甯反覆。不自覺其言之長。而辭之激也。嗟乎。物競天擇之用。未嘗一息亡於人間。大地之輪廓。百昌之登成。止於有數智使。者既多取之。而豐。愚儒者自少分焉。而奢。豐奇之際。盛衰係之矣。且人莫病於言非也。而相以爲是。行禍也。而相以爲福。禍福是非之際。微乎其微。明者猶或笑之。而況其下者乎。殆其及之而後知。履之而後覺。其所以失亡者。已無

藝矣。此予智者罣接陷阱之所以多也。欲違其災。舍窮理盡性之學。其道無由而學矣。非循西人格物科學之律令。亦無益也。自秦愚黔首。二千歲於茲矣。以天之道。舟車大通。通則雖欲自安於愚。無進於明。其勢不可。數十百年以往。吾知黃人之子孫。將必有太惠痛恨於其高曾祖父之所爲者。嗚呼。可不悲哉。

光緒二十七年歲次辛丑八月既望嚴復書於輔自然齋。

中西年表

西歷前二十四世紀 起甲辰訖庚子

唐堯元載至五十七載

西歷前二十三世紀 起辛丑訖庚辰

唐堯五十八載至百有二載 虞舜五十載 夏禹元載至五載

西歷前二十二世紀 起辛巳訖庚申

夏禹六載至八載 帝啓九載 太康二十九載 仲康十三載

帝相二十八載 少康元載至十八載

西歷前二十一世紀 起辛酉訖庚子

夏少康十九載至六十一載 帝杼十七載 帝槐二十六載 帝芒

元載至十四載

西歷前二十世紀 起辛丑訖庚辰

夏帝芒十五歲至十八歲 帝泄十六歲 帝不降五十九歲 帝局

二十一歲

西歷前十九世紀 起辛巳訖庚申

夏帝厘二十一歲 孔甲三十一歲 帝皐十一歲 帝發十九歲

桀癸元歲至十八歲

西歷前十八世紀 起辛酉訖庚子

夏桀十九歲至五十二歲 商湯十八歲至三十歲 太甲三十三歲

沃丁元祀至二十祀

西歷前十七世紀 起辛丑訖庚辰

商沃丁二十一祀至二十九祀 太庚二十五祀 小甲十七祀 雍

己十二祀 太戊元祀至三十七祀

西歷前十六世紀 起辛巳訖庚申

商太戊三十八祀至七十五祀

仲丁十三祀

外壬十五祀

河亶

甲九祀

祖乙十九祀

祖辛元祀至六祀

西歷前十五世紀

起辛酉訖庚子

商祖辛七祀至十六祀

沃甲二十五祀

祖丁三十二祀

南庚二

十五祀

陽甲七祀

盤庚元祀

西歷前十四世紀

起辛丑訖庚辰

商盤庚二祀至二十八祀

小辛二十一祀

小乙二十八祀

武丁

元祀至二十四祀

西歷前十三世紀

起辛巳訖庚申

商武丁二十五祀至五十九祀

祖庚七祀

祖甲三十三祀

庚丁

六祀

庚丁元祀至十九祀

西歷前十二世紀

起辛酉訖庚子

商庚丁二十祀至二十一祀

武乙四祀

太丁三祀

帝乙三十七

祀

紂辛三十二祀

周武王十三年至十九年

成王元年至十五

年

西歷前十一世紀

起辛丑訖庚辰

周成王十六年至三十七年

康王二十六年

昭王五十一年

穆

王元年

西歷前十世紀

起辛巳訖庚申

周穆王二年至五十五年

共王十二年

懿王二十五年

孝王元

年至九年

西歷前九世紀

起辛酉訖庚子

周孝王十年至十五年

夷王十六年

厲王五十一年

宣王元年

至二十七年

西歷前八世紀 起辛丑訖庚辰

周宣王二十八年至四十六年

幽王十一年

平王五十一年

桓

王元年至十九年

西歷前七世紀 起辛巳訖庚申

周桓王二十年至二十三年

莊王十五年

釐王五年

惠王二十

五年

襄王三十三年

頃王六年

匡王六年

定王元年至六

年

西歷前六世紀 起辛酉訖庚子

周定王七年至二十一年

簡王十四年

靈王二十七年

景王二

十五年

敬王元年至十九年

西歷前五世紀 起辛丑訖庚辰

周敬王二十年至四十四年

元王七年

貞定王二十八年

考王

十五年 威烈王二十四年 安王元年

西歷前四世紀 起辛巳訖庚申

周安王二年至二十六年 烈王七年 顯王四十八年 慎王六年
年 赧王元年至十四年

西歷前三世紀 起辛酉訖庚子

周赧王十五年至五十九年 東周君七年 秦莊襄王二年 始皇

帝三十七年 二世三年 漢高帝元年至六年

西歷前二世紀 起辛丑訖庚辰

漢高帝七年至十二年 惠帝七年 呂后八年 文帝前十六年後

七年 景帝前七年中六年後三年 武帝建元六年 元光六年

元朔六年 元封六年 元鼎六年 元封六年 太初四年

西歷前一世紀 起辛巳訖庚申

漢武帝大漢元年至四年 太始四年 征和四年 後元二年

昭帝始元六年 元鳳六年 元平一年 宣帝本始四年 地節

四年 元康四年 神爵四年 五鳳四年 甘露四年 黃龍一

年 元帝初元五年 永光五年 建昭五年 竟寧一年 咸

帝建始四年 河平四年 陽朔四年 鴻嘉四年 永始四年

元延四年 綏和二年 哀帝建平四年 元壽二年

西歷第一世紀 起辛酉訖庚子

漢平帝元始元年至五年 孺子嬰二年 新莽初始一年 始建國

五年 天鳳六年 地皇三年 淮陽王更始二年 東漢世祖建

武三十一年 中元二年 明帝永平十八年 章帝建初八年

元和三年 章和二年 和帝永元元年至十二年

西歷第二世紀 起辛丑訖庚辰

漢和帝永元十三年至十六年 元興一年 廢帝延平一年 安帝

永初七年 元初六年 永寧一年 建光一年 延光四年

順帝永建六年 陽嘉四年 永和六年 漢安二年 建康一年

沖帝永嘉一年 質帝本初一年 桓帝建和三年 和平一年

元嘉二年 永興二年 永壽三年 延熹九年 永康一年

建寧四年 熹平六年 光和六年 中平六年 獻帝

初平四年 興平二年 建安元年至五年

西歷第三世紀 起辛巳訖庚申

漢獻帝建安六年至二十五年 後漢昭烈帝章武二年 後主建興十

五年 延熙二十年 景耀五年 炎興一年 魏咸熙元年

晉武帝泰始十年 咸寧五年 太康十年 惠帝永熙一年 元

康九年 永康一年

西歷第四世紀 起辛酉訖庚子

晉惠帝永寧元年 太安二年 永興二年 光熙一年 懷帝永

嘉六年 愍帝建興四年 東晉元帝建武一年 太興四年 永

昌一年 明帝太寧三年 成帝咸和九年 咸康八年 康帝建

元二年 穆帝永和十二年 升平五年 哀帝隆和一年 興寧

三年 帝奕太和五年 簡文帝咸安二年 孝武帝寧康三年

太元二十一年 安帝隆安元年至四年

西歷第五世紀 起辛丑訖庚辰

晉安帝隆安五年 元興三年 義熙十四年 恭帝元熙二年

宋高祖永初二年至三年 少帝景平一年 文帝元嘉二十一年 武

帝孝建三年 大明八年 廢帝景和一年 明帝泰始二年至七年

泰豫一年 蒼梧王元徽四年 順帝昇明二年 齊高帝建元

四年 武帝永明十一年 明帝建武四年 永泰一年 東昏侯

永元二年

西歷第六世紀 起辛巳訖庚申

齊和帝中興一年 梁武帝天監十八年 普通七年 大通二年

中大通六年 大同十一年 中大同一一年 太清三年 簡文

大寶二年 元帝承聖三年 敬帝紹泰一年 太平一年 陳高

祖永定三年 文帝天嘉六年 天康一年 廢帝光大二年 宣

帝大建十四年 後主至德四年 禎明二年 隋高祖開皇九年

二十年

西歷第七世紀 起辛酉訖庚子

隋高祖仁壽元年至四年 煬帝大業十二年 恭帝侑義寧一年

恭帝桐皇泰二年 唐高祖武德三年至九年 太宗貞觀二十三年

高宗永徽六年 顯慶五年 龍朔三年 麟德二年 乾封二年
總章二年 咸亨四年 上元二年 儀鳳三年 調露一
年 永隆一年 開耀一年 永淳一年 弘道一年 中宗嗣
聖元年至十七年

西歷第八世紀・起辛丑訖庚辰

唐中宗嗣聖十八年至二十一年 神龍二年 景龍二年 睿宗景
雲二年 太極一年 元宗開元二十九年 天寶十四年 肅宗
至德二年 乾元二年 上元二年 寶應一年 代宗廣德二年
永泰一年 大歷十四年 德宗建中四年 興元一年 貞
元元年至十六年

西歷第九世紀 起辛巳訖庚申

唐德宗貞元十七年至二十年 順宗永貞一年 憲宗元和十五年

穆宗長慶四年

敬宗寶曆二年

文宗太和九年

開成五年

武宗會昌六年

宣宗大中十三年

懿宗咸通十四年

僖宗乾

符六年

廣明一年

中和四年

光啓三年

文德一年

昭

宗龍德一年

大順二年

景福二年

乾寧四年

光化三年

西曆第十世紀

起辛酉訖庚子

唐昭宗天復元年至三年

昭宣帝天祐三年

後梁太祖開中四年

乾化二年

梁主瑱乾化三年至四年

貞明六年

龍德二年

後唐莊宗同光三年

明宗天成四年

長興四年

閔帝應順一

年

廢帝清泰二年至三年

後晉高祖天福二年至八年

• 出帝開

運三年

後漢高祖元年（稱天福十二年）次年（稱乾祐元年）隱帝

世宗顯德六年

宋太祖

乾祐二年至三年

後周太祖廣順三年

世宗顯德六年

宋太祖

建隆三年

• 乾德五年

開寶八年

太宗太平興國八年

雍熙

四年 端拱二年 淳化五年 至道三年 眞宗咸平元年至三年

西歷第十一世紀 起辛丑訖庚辰

宋眞宗咸平四年至六年 景德四年 大中祥符九年 天禧四年
乾興二年 仁宗天聖九年 明道二年 景祐四年 寶元
二年 康定一年 慶歷八年 皇祐五年 至和二年 嘉祐
八年 英宗治平四年 神宗熙寧十年 元豐八年 哲宗元祐
八年 紹聖四年 元符三年

西歷第十二世紀 起辛巳訖庚申

宋徽宗建中靖國一年 崇寧五年 大觀四年 政和七年 重
和一年 宣和七年 欽宗靖康一年 高宗建炎四年 紹興三
十二年 孝宗隆興二年 乾道九年 淳熙十六年 光宗紹熙

五年 寧宗慶元六年

西歷第十三世紀 起辛酉訖庚子

宋甯宗嘉泰元年至四年 開禧三年 嘉定十七年 理宗寶慶三

年 紹定六年 端平三年 嘉熙四年 淳祐十二年 寶祐

六年 開慶一年 景定五年 度宗咸淳十年 恭宗德祐一年

端宗景炎二年 帝昀祥興二年 元世祖至元十七年至三十一

年 成宗元貞二年 大德元年至四年

西歷第十四世紀 起辛丑訖庚辰

元成宗大德五年至十一年 武宗至大四年 仁宗皇慶二年 延

祐七年 英宗至治三年 泰定帝泰定四年 文宗天歷二年

至順三年 順帝元統二年 至元六年 至正二十七年 明太

祖洪武三十一年 惠帝建文元年至二年

西歷第十五世紀 起辛巳訖庚申

明惠帝建文三年至四年 成祖永樂二十二年 仁宗洪熙一年

宣宗宣德十年 英宗正統十四年 景帝景泰七年 英宗天順八

年 憲宗成化二十三年 孝宗弘治元年至十三年

西歷第十六世紀 起辛酉訖庚子

明孝宗弘治十四年至十八年 武宗正德十六年 世宗嘉靖四十五

年 穆宗隆慶六年 神宗萬曆元年至二十八年

西歷第十七世紀 起辛丑訖庚辰

明神宗萬曆二十九年至四十八年 熹宗天啓七年 懷宗崇禎十六

年

大清順治十八年 康熙元年至三十九年

西歷第十八世紀 起辛巳訖庚申

中國年表

編書院印

康熙四十年至六十一年

雍正十三年

乾隆六十年

嘉慶元年

至五年

西曆第十九世紀 起辛酉訖庚子

嘉慶六年至二十五年

道光三十年

咸豐十一年

同治十三年

光緒元年至二十六年

原富

英倫斯密亞丹原本

侯官嚴復幾道翻譯

發凡

凡一羣生事之所需皆於其民力是出是故國之歲費與其歲殖有相待之率焉殖過費則爲盈盈則其民舒費過殖則爲朒朒則其民蹙其所視以爲盈朒者常在四事一曰致力之巧拙二曰出貨之疾徐三曰生者之衆寡四曰執業之損益無論其國天時地利之何如率之盈朒恒視此四者均是田也甲十鍾而乙五則巧拙之分也均是民也此日一而彼日百則疾徐之異也至於游民衆多作爲無益國以之貧其故尤易知耳

雖然四者孰重乎曰巧拙疾徐重而衆寡損益方之輕也凡屬初民多爲漁獵稍進乃耕稼夫漁獵之衆莫不操網罟執弓矢矣而耕稼之民亦無一夫之不出一女之

不織。彼其生未嘗不衆也。其爲未始無益也。顧今如是之民。往往赤貧羸苦。時憂乏絕。而游牧之國。乃常以生事弗供。捐溺幼孩。播棄黎老。以食爲鷹狼虎而不憐。獨至文物聲明之國。其民生而不勞力者至多。而奉養之優。轉什伯於勞力者。一國之內。百產充溢。衣食饒衍。其中最下小民。苟勤謹治生。則口體之養。有絕非草昧之民所能得者。然則卽已事而觀之。四者重輕。大可見矣。

吾之爲書。將以考國富之實。與夫所以富之由。以前說之故。首論力作生財之功。所以益疾益巧之理。與夫生財之後殊等之衆食報。所以不同之由。是爲部甲。

夫力作生財之功。惟其巧拙疾徐既等。而後其所生之財。與生者之衆寡有比例也。而生者之衆寡。又視積貯之盈虛。與夫發貯興事者之得失以爲差。故吾次及母財。明其爲物之情。講其積蓄之理。與夫母財異施而國中力作亦以不同之故。是爲部乙。

巧疾交臻之後。則本末之趨。其勢常分。富國之效。因之亦異。重本者則厲力田樹畜

之民。要末者則講通商惠工之政。此其趣民力作均也。而有在野在邑之異。野邑之間。道國者意恆有所偏重。今夫亞洲（亞細亞即古安息轉音。蓋西人分大地爲五洲。其三皆命於希臘。始皆一壤之名。其後乃舉以被其全洲。希人謂其國之西地爲歐羅巴。埃及與加達幾諸部則曰阿非利加。其始僅全洲之北地。瀕海者。猶東國之稱亞細亞。乃分亞洲之西極。今則別之曰小亞細亞。小亞細亞者。漢所云安息。安亞。息。細音近。而收音之亞。則猶波斯俄羅斯各名之收音例也。）震旦。亘古重農。而歐洲則自羅馬不綱以來。國以製造懋遷相尙。此其所以致然之故。皆有至理定勢爲之。非微攷而深論之。不可見也。是爲部丙。

本末異重者。其始或由私利之牴牾。或由黨類之偏見。初非於其流極利害有前識也。然由此而計學之家（理財明富名曰計學）宗旨大異焉。或以謂國之大命在農。或以謂利俗裕民莫若工賈。此其說始則見於著述議論之間。繼則異於發政施令之際。吾欲取諸家之說。審其異同。窮其事驗。用以見古今諸國生理之所以不齊。

是爲部丁。

前四部之言財也。考租庸。論本末。皆合通國之盈虛息耗而言之。於國家之賦稅度支。則未嘗專及也。此論賦稅。總爲三篇。首言國無論君主民主。皆有不啻己之度支。自設官結戎。以至宮寢之御。何者爲國之正費。而此正費何者宜無區別。以賦諸通國之民。何者宜有區別。而於彼民宜國。於此民宜賦。次言征歛之事。術各不同。違何術則賦廣而民便之。失何道則賦糜而民以怨。末言近代諸邦。以何因緣。皆有國債。而國債之事。其與民生國計。利病云何。蓋是三者明。則成賦經國之理備矣。是爲部戊。

原富部甲目錄

篇一論分功之效

篇二論分功交易相因爲用

篇三論分功交易相爲廣狹

篇四論泉幣之始

篇五論物有真值與市價異

篇六論物價之析分

篇七論經價時價之不同

篇八釋庸

篇九釋寡

篇十論業異而庸寡不同之故

一業品之殊

二政約之異

第十一釋租

一地產之常得租者

二地產之不常得租者

三常得租與不常得租二產隨世升降相待之變率

四旁論前去四百年中銀值之騰跌

五金銀相兌之變率

六物產區爲三類民生日進著效之不同

七結論銀值進退之理

八論民業日進其效見於熟貨者

九通結本篇論租

原富部甲上

英倫斯密亞丹原本

侯官嚴復幾道翻譯

篇一

論分功之效

天下之常言曰民生在勤然則力作者將斯人所定於天之分而無可逃者歟雖然均力作矣其得效則此多而彼少其致力則此益疾益巧而彼常拙常難其故果安在也曰其事首判於功之分不分

功以分而收效益多此民生日用之中所在在可見者也顧其效於小工作易見於大製造難知小工作所居之地狹所用之人寡所作之事不繁可一覽而盡也至於大製造則不然其所仰給者非一處之產能所辦也往往取輪於甲求輿於乙衝軫齒棟各異其地擴而聚之而後成車其功之分難以見也故欲明分功之有益力作

則莫若明以小工作之業

案斯密氏成書於乾隆四十年。去今百餘歲矣。故其所言多與西國今日之情形異。今日大製造多萃於一廠一肆之中。蓋鐵軌既通。會合甚易。而一以省中情之費。二以交相保險。而收利不貲重輕。此雖大製造所以不敢處也。

不見夫業鹹者乎。使不習者一人而爲之。窮日之力。幸成一鹹。欲爲二十鹹焉。必不得也。今試分鹹之功。而使工各專其一事。拉者。載者。挂者。銳者。或磋其芒。或鑽其鼻。或淬之使之犀。或藥之使有聲。或運純焉。或匿納焉。凡爲鹹之事十七八。或以手。或以機。皆析而爲之。而未嘗有兼者。則計一日之功。可得八萬六千鹹。而或且過此數。此見諸實事者也。使以十八人爲此。是人日四千八百鹹也。往者不分其功。則一人之力。雖至勤極敏。日不能二十鹹。今也分其功而爲之。則四千鹹而裕如。然則以分功之故。而益人力二百倍有餘也。治鹹如是。他製造可類推矣。吾故曰。益力之事。首在分功。

分功之爲事大抵分之愈簡則其益力愈多而民生日優則分功之事日細蓋二皆有相資之用焉今夫野蠻之國其一民之業在文明之國皆數人分治而不足者也彼之耕稼陶漁弓矢鞬幕不異人而任之而此則一尋常服食器用之微其分功之多有不可勝數者夫如是則卽分功之繁簡又可以覘人國治化之淺深矣雖然事有殊形不能皆分之至極簡易如治鍼也譬如田功則分之不能若工賈之細矣蓋田功因時春耕夏耘秋收冬種不能一時動而三時逸也其功之不可分以此而農術之進不若他業之多者亦以此富國與貧國較其農與工固皆勝也而勝之於農者終不若勝之於工者之無窮民力優母財足其播種也以時其得稼也恆有以盡其地力計其所勝如是而已然而其所出之糧與其所費之財與力常爲比例不能遠過也是故富國與貧國之粟美惡同則價相若富者之粟不能比貧者廉也波蘭之與法國其貧富相懸遠矣法之與英則又異也其田疇之荒治則殊而三國之穀價相若此不僅穀之一事然也地之所產皆如此矣此所謂生貨者也波蘭所出太

半生貨。至於熟貨。則舍物陋常物之外。往往而絕。欲與英法比隆。變乎遠矣。

功分則人力之收效益多。收效益多。則生財之能事愈大。此其所以然之故。有三事。簡而人習。一也。業專而玩愒不生。二也。用意精而機巧出。三也。

所由於事簡而人習者。此最易見也。蓋用志不紛。雖事有至難。及其久之。皆若行其所無事。故欲事之習。必功之分。分之益簡。習之益至。又嘗觀鐵匠之爲釘矣。其非專業者。窮日之力。僅二三百枚。而多不純善。苟其專爲。則日能八九百枚而善。吾見日成二千三百枚。而枚枚皆善者。問之。則童而習此。未嘗他務者也。專之爲效。不其見歟。雖然。人爲全釘。尙非極簡之業也。鼓鑪聚炭。冶鐵奮錘。皆一人之事。而一釘之中。斲其頭。盡其尾。其用器致功。皆不同也。故僅若此。使由是而益分之。若治飯之爲者。則人之成釘。不啻倍蓰此數。又可知也。

所由於業專而玩愒不生者。民之能勤。在無棄時而已。棄時無異於棄財也。業不專而屢易。其棄時必多。民之治一業也。飭其材。庀其器。而後從事焉。使不易業。無待更

求也。易之必仿他材，必仿他器，而前仿前比者，皆無用矣。此其棄時一也。常人之情，於易事之頃，不能無趑趄。當其始爲之時，心未能即專也。力未能即奮也。必有頃焉，乃臻服習已服習而心專力奮矣。又使之轉治他業，彼必遑緩徘徊，以爲休息之頃。使如是日數易焉，何怪其功之隘而所需時日之多乎？此其棄時二也。此於一業固不覺也。使合一國通數十年計之，則爲之不疾而財之所以不生，皆坐此矣。且民既以業專而習，亦以業紛而惰也。鄉僻之傭工，所操之業，食頃輒易。每易之際，必延宕容與而後即功。初爲之時，其於事亦多不精審。如是習之既久，遂成潦倒惰傭，蓋比比也。

所由於用意精而機巧出者，西國益事省力之機，半由分功而出。蓋用意既精，巧捷之術，恍若來告。吾觀於工廠而遇極巧之機，叩其所由，多由工傭前以手足專司此事，後得巧法，創成此機。如汽機初創時，凡百運轉皆機自爲，獨汽輪之肉，開闢須由人力，以其事輕，司以童子。後此童子思欲趁閒遊戲，因接桿繫繩，使其隨機開闢，此

乃汽機中第一妙製。然其作者由於專業之童。舉此一端。則機由習創。非虛語也。夫以機代工。則爲之者疾。夫人而知之矣。然機之所以成。不必由執其工者。製造之師。以造機爲專業。一機成家。以之富。故竭其耳目心力爲之。格致家者。不奮手足之烈。專以仰觀俯察。學問思索爲功。故於物力陰陽。獨具先覺之智。文明之國。格致之學。與百工同人。專一途。而易事通功。有相得之用。故民智愈高。學之分功愈細。業亦益精。此專家之學所以衆也。方其聚精會神。人守一學。若甚睽孤也者。速合以成之。則一群之民智大進。此其有益人國。不僅富之一言所可盡也。而富爲尤著。蓋功分而爲之者疾。爲之者疾。而百工之生物蕃。一人之所出。皆仟佰其所自需。人人有餘。而交易之事起矣。農以粟易械器。陶冶以械器易布帛。轉相爲易。至於各養其欲。各給其求而後止。然此猶是爲未有圖法泉幣者言也。泉幣興。則其爲易益神。而財益進。故分功之國。民勤而生物蕃。生物蕃而交易起。交易起而財用足。

民有相資之用。邦乃大和。今夫生於文明之國。而身爲賃工之傭。亦貧且賤矣。願觀

其一身一室之所有爲計其所仰給之人則百千萬億猶未盡也聞者疑吾言乎則先卽其一鬲而論之山毛布者首羊羊有牧者毛有斂者既斂而凍而怵而染而紡而織而礪而縫而後成鬲是獨指至切者言之其所待者固已衆矣然所待者又有所待也羊之毛不必其地之所有也於是乎有轉運之事以舟以車舟必有造舟者車必有造車者編其帆緇其索均其輪字其馬至於槩樁轡銜之類皆必有工缺焉則其事不舉鉏鐵器也於是乎有升人有爐匠有陶有冶有樵有立宮室者有鼓鑪耨者有齏錘者磨者礪者少焉則此鉏與凡鐵之事皆不生轉而計之豈有盡哉然則是儲一身一室之所有其至粗極陋固也顧其牀榻臥具刀几鼎鑪與夫飲食餅酒之事其所待之人功雖巧歷不能計也是知人之在群雖至貧賤皆必有無窮之人與爲通功易事之事而後濟微論富貴者矣雖然惟文明之國乃有是也非洲野蠻之王其壤地萬里億兆之衆殺生隨心求如吾儲一日之奉必不能也吾故曰無化之王不若有化之儲

案斯密氏之論分功也。可謂辨晰矣。雖然。自後之計學家觀之。猶有未盡者。斯密之所言者。通功易事也。異事而相資也。然其事必自通力合作始。通力合作者。同事而相助也。十手而牽一鼎。十足而舉一確。使不如是。事之不舉者衆矣。烏致有餘而爲易乎。且斯密所指分功之益。亦未賅也。所指之外。尙有四焉。一曰不異人而事辦。今馳傳之人。其持一絨。與持百絨千絨。勞力均也。收者之飼一牛。與飼十牛。爲事相若也。功分則無贅人。二曰不異事而效收。事固有飭材庀工之後。惟恐求者之不多。印書其一事也。功之未分。則人而鈔書也。功分則無贅事。三曰人得各審其才之所當。夫人各有能有不能。使不分功。則或強於其才所不當。而力糜事苦。惟分功而後。各出其所長也。四曰地得各出其產之所宜。夫粵鍾宋例。產各有宜。不分功。則遷地而不能良。既分功。則地各收其所美。四者既合。人之能事益宏。而財乃大出也。

論分功交易相因爲用

功分而生財之能事益宏其事非俟聖人起而後爲之施設也非前知其能生財而後分之若此也蓋起於不得已焉夫人生而有群天與之以有欲其所以養此欲者求之一人之身不能備也則其勢必取於相資是故交易之事國而有之其利鉅繁簡各視其進化之深淺爲差獨至禽獸則雖最靈者不能兩狗之逐兔也一角之一犄之有相資之用焉顧其事起於適然各逐其欲而偶有合非相爲約而各任其一事也鳥不相易蟲猿不相易果蓋易者必先有此彼之分此彼之分禽獸未嘗有也故交易之事惟人爲能且禽獸之得食也於其類則以爭強者得之不問其誰屬也其於人則以媚搖尾齟舌伏身帖耳幸主人之已悅分其餒以果腹焉人之有求於其類也姘阿卑伏曲體順旨與禽獸同術者固有之矣然而不可常用也生夫群之中蓋無時焉不待無數人之我供而後足使必俟悅我者則竭畢生之精力所結而相驩者能幾人哉雖欲用禽獸之術自給勢有不能夫吾既常有求於群而他人之

惠養又不足恃。吾將何所恃以奉吾生乎。曰。恃天下之各恤其私而已矣。人自營之蟲也。與自營之蟲謀其所奉我者。是非有以成乎其私。固不可也。市於屠。酷於繻。糴乎高廩者之家。以資吾一殮之奉。非曰屠肆高廩者之仁有足恃也。恃是三者之各恤其私而已。入日中之市。而與蚩蚩者爲易也。意皆曰。與我彼。吾與若是。是之於若。方彼之於若。爲有贏也。則市之人皆歆之矣。此吾所以奉吾生者也。今夫無所易而受人之惠養者。蓋有之矣。行句是也。然而無所易者其一。而有所易者多也。受財物於仁人。而是財物者。不能適如其所求也。方舉是以與市人爲易。飢所食。寒所衣。風雨所庇。穀皆必易焉。而後得之。則固與不句者同也。然則交易者。固人道所不能外也。

有質劑。(謂相易以約者)有交易。(謂相易以物者)有買賣。(謂以財爲易者)而生事以供。亦有是三者而分功以著。射獵游牧之民。其中有善爲弓者。善爲矢者。以其弓矢。易他人之禽獲牛馬。如是而得。方之自獵自牧之得爲多。則彼將終於

弓矢之業。而爲弓人矢人矣。又有善爲屋廬繕幕者。爲他人之屋廬繕幕。而他人與之牛羊脯鮮。如是而得。方之自獵自牧之得爲多。則彼將終於屋廬繕幕之業。而爲梓人幕工矣。又如是有攻金之工。爲之刀斤劍削。又如是有攻皮之工。爲之衣裘冠履。是故治化既開。易事乃始。易事既有。乃各審其耳目手足之所最宜。各操一術。焉以前其群之用。勞一人之心與力。而各有所出。自事不盡。斥其餘以爲易。以給他人之求。而已亦得。其所欲。始也以材力地勢異其業。異之既久。乃爲習者之門。獨擅能事。衆莫能與之爭。

雖然。天之生才。其爲異也。始微。彼之各以其能鳴。而相望若不及者。非用異以爲分。實因分而致異。苟自後而觀之。則聖人之與游手。度量相越。豈有涯哉。雖然。非生而異也。服習游處。被教砥礪之不同。由斯異耳。乳齒未毀。性情智慮。不相絕踰。當此之時。雖父母比鄰。不能捐其異也。洎丁壯而操業不同。鷹鷂之分。稍稍見矣。其究也。一則乃聖乃智。一則爲奴爲隸。聖智奴隸。固有殊矣。而孰謂其始之未嘗殊哉。今使民

生而不易事。不易事則不分功。不分功則人之生事大致相若。事相若則習同。習同則民品一。草昧之民其智若一邱之貉者。正坐此耳。故知民才相懸。待心力分勞而後有也。

案才異始微。初民如是。至進化既久之後。則有種業積累之異。不盡同也。

由此觀之。以人情之樂相爲用。而有交易。而有分功。分功久而人品殊。然數者相爲首尾。亦以樂相爲用。而後收殊品之利也。禽獸類同而品殊者衆矣。不待教。不由習。生而可見者也。人之生。聖智奴隸之爲異。不若樊之與盧。盧之與龐。龐與牧狗之爲異也。樊以絕有力著。盧以善走著。龐以善牧狗以馴著。其能品各殊而不相爲用。此何故也。不易則不通。不通則雖有殊能而皆立於獨。爪牙目鼻各用其所受於天者。以自爲養。而於同類則無利也。至於人則不然。或勞心焉。或勞力焉。而皆有相益之用。民生而能操一技。則皆有以食於其群。自聖智爲一世之耳目。至於轉移執事者之賤且勞。皆爲其群所不能廢。故分功交易而人道尊。

篇三

論分功交易相爲廣狹

分功交易相爲用則相爲廣狹。山城小市之民貿易所通其地甚狹無取於專產一貨。洪範八政一曰食二曰貨食謂農殖穀穀可食之物貨謂布帛可衣及金刀龜貝所以分財布利通有無者如此則名貨者獨財帛其名不但不能賤食且不能賤餘物矣。今是書中凡有交易之數者皆以貨稱與古義異學者詳之。一專攻一業何則自用而外多致餘饒匪所與易故也。彼方舍其專而業其策輟其一業之有餘以補他業之不足夫而後生事得粗具也。天下固有至微賤之工而非大邑通都莫能存者轉移執事之備是已。負戴提挈其爲技能淺矣然不僅村墟屯集之中靡所用之即在中市亦不能常得其雇直。邊鄙之民衆而處者多不過數十百家其中農民爲屠者爲餅師爲醢者凡一家之所需大抵求之一身而備如治如梓如攻石之工約百里而一有而謂茅綯索例皆家自爲之不能如都會之中雇某作治某事也。即

有分功亦分其大要而已。攻木者總梓匠輪輿。攻金者總冶桃堯栗。事近則一工兼程焉。再析爲細。勢不能也。今如蘇格蘭之山邑。歲用釘不過千數。而中巧者日製千釘。使其專之。則三百六旬中。一日食而餘日餓也。可乎哉。

地勢之於人事也。川所以爲通。山所以爲阻。故舟車皆以通貨。而車不及舟。地爲水所通者。其市場必廣。而百工以興。此所以分功之所始。必在湖海多江河之國。而內地去水遠者。常貧陋。僿野而後時也。試爲計之。以一大車運四噸之貨。自倫敦以往。額丁白拉將車者二人。輓車者八馬。需時七日者六。而後能達也。以水道言之。則操舟者七八人。爲時亦四十二日。其由倫敦至額。可以運二百噸。此實與百人車五十馬四百者所致同也。夫此人百車五十馬四百者。將非徒用也。必有此四十二日人畜之糶。與夫車與馬之所磨損。其他煩費。因無論已。至於水道。不過六七人之所食。一舟之磨損。與風波之偶然。此其難易廉費。豈可同日語哉。設此二邑者。無水以爲通。則其所行之貨。必其輕。備珍貴。價高而利厚者。乃足以致。其不能若今日之百貨。

莫不通無疑也。故市場狹者其交易寡，交易寡者其功不分，則貨棄於地而利溷矣。由倫敦以至錫羅屈蘭，其爲遠幾何？使惟有陸可通，將行何貨焉？乃可以當其費？當其費矣，而途中所遇凶悍野蠻之國無數，能卒達者幾何？然而二邑者，今之交相爲市者至衆也，互相爲用而百工興，民各以富，夫非斯水之力也哉。

是故近水之士民動而業良，其爲通愈速，其爲業彌富，富厚文明，由此而出。遠水之土四境而外，與通者希，大海之濱可漕之河皆爲四鄰之所隔，其爲市也，僅視本土之富庶以爲差，故富教之效皆劣於近水者。北美之始墾也，來而集者皆沿江海之端，其深入內地者，往往而絕也。

考之於史，尤可知矣。歐洲治化始於地中海之四周，天下水入地深者，莫此海若。不通瀾沙，舍風所鼓，則無巨浪，小大諸島棋布星羅，故水恬而多可泊，初民舟製不堅，不識鐵之用，於此海最宜去岸過遠，目不見山，則憚而不敢試，芝伯羅塔者，地中擲出大西洋之門戶也。大秦之人謂曰巨壘之缺，過此以西，動色相戒，涉者獨非尼

加加達幾尼亞二部之民垂千餘年餘國之民莫有出者

環地中海之濱十餘國埃及最古其民講於農工最先埃及分上下國拂尼祿以南爲上埃及皆並河爲聚落去岸不百里則荒地矣尼祿下流播爲十數支爲下埃及網分脈結在在可以通航城邑林立而其民皆矧佚富厚焉北之荷蘭蘇爾國也其土與財以比例言於他國無所讓亦以瀕海而有鄂林摩斯二河之故是故海國多港汊內地多江河不淤不溢而常可漕者國之至寶致富之資也希臘義大里在古稱富強而至今爲建國者讓是故耳

東攬夫亞細亞則印度之孟加拉最富庶而支那各省財賦最盛稱三吳一則瀕印度洋而承殊徼之衝一則臨東海而扼揚子之吭此皆與埃及之尼祿河同其利用者也埃及印度支那三古國皆有海禁以內地市場已廣不願有外交以致煩伺然而三國者皆古盛而今衰

五洲之地阿非利加最混沌無殺其民將古稱野蠻而亞洲內地距水遠者如斯古

地亞薩紐錫伯利亞亦亘古未進化。由北溟洩凍大河散處。不可溝通故耳。至如波羅特亞都里厄特黑海諸水之在歐。如亞拉伯灣波斯灣孟加拉灣暹羅灣渤海諸水之在亞。皆斗入大地數百千里。使之批發導竅。以成互通之利。而非洲則未嘗有也。且國有河而不播爲小支。或踞其上游。而入海下流。爲他族所割據。則其通商不盛。蓋無支流則不相匯通。失下游則出入多梗。此所以達牛河雖長大。而於上游諸國匪所利者。坐海口爲土耳其所據也。此與有河之全由源達海者。利害相懸遠矣。案中國北之黑龍。南之瀾滄。皆坐此患。一失之於俄。一失之於法也。

篇四

論泉幣之始

分功局定。民之生事。取足於己者。日以少。待給於人者。日以多。專營一業。自享有餘。以與其群爲易。懸遷有無。民皆待易而後足。如是之群。命曰商群。

爲易之始。必有所鑒。甲居一貨而有餘。乙於此貨有不足。則甲願以易。乙願易而得。

之然使乙之所以易非甲之所欲有則易之事窮屠者鼓刀而宰全牛之肉非一身一家之所能盡也餅師釀者皆樂分有之餅師之易必以餅釀者之易必以酒設屠既有餅酒而不欲多則易之事又窮如是屠者苦於有餘餅釀苦於不足卒不能相爲用焉此大不便也有智者起別儲一物使隨時隨地出以爲易人皆樂之而不吾拒則生事得常給矣

如是之物名曰易中方古之時易中亦多物矣有以馬牛羊者凡貿易之事皆以馬牛羊也由今觀之甚拙可笑然古之時資產物價以馬牛羊計者載之傳志不知凡幾鄂謨之詩謂諦阿默德之甲直九牛而格魯古之甲直百牛矣（考工記云牛戴牛）亞伯斯尼亞之易以鹽印度以象貝紐方蘭以乾魚威占尼亞以菸葉支那以鹿皮以布以縑衛藏以茶磚而蘇格蘭之民尙有攜釘以入酒肆者皆易中也

治化漸開易中必舍他品而用諸金者必至之勢也諸金之爲物也不獨經久不蠹爲萬物尤且析爲至微於值無損而由散爲合又易易也夫可析易合者易中最要

之能事也。而他品不能如寶石如珠。大以豪華。值相倍蓰。不得以輕重爲比例也。既析不能復合。合之不能復原值也。此其爲易中不便明矣。如牛如羊。未食則不可析也。已析則不可合也。今有以羊易鹽豉者。凡易必以全羊。不可少也。苟欲多則必倍之。必三之。此其爲易中不便又明矣。至用諸金。則可析可合。而多少輕重。皆可相準。此其獨有之德也。故以爲易中最宜。

案漢貢禹於元帝時欲罷鑄錢諸官。而用布帛及穀。議者亦謂交易待錢。布帛不可尺寸分裂。而禹議以寢。

古今所用爲易中者。貴賤諸金皆有之。希臘之斯巴丹以鐵。羅馬以銅。印度以銀。今歐洲各國則金銀並用。

案中國古者皮幣。諸侯以聘享。金有三等。黃金爲上。白金爲中。赤金爲下。是三品並用。與今英法諸國同也。至秦并天下。幣二等。黃金以益爲名。上幣銅錢文曰半兩。重如其文。下幣而珠玉龜貝銀錫之屬。爲器飾寶藏。不爲幣。是金銅並用也。漢

與以秦錢重難用。乃更鑄英錢。降而爲五銖。後代所用。大抵損益五銖。漢錢號爲圖法。而齊布秦刀。諸品微矣。黃白二金。亦無範以爲圖法者。

古用金爲幣。無圖法也。羅馬之有圖法。自司爾威始。初以銅版資交易。其不便甚衆。出入必衡。一也。懼其難無以驗。二也。賤金可忽。貴金銖黍之差。爲值甚鉅。非審權微驗不可。則廢時失事之道也。小民挾零金易常物。必皆有事於衡。旣已煩矣。而別其雜僞尤難。權金之器。驗金之藝。固不能以時具也。則相率爲奸欺。奸欺日衆。其群乃疑。而利用厚生之道。寔微浸滅。故欲富其國。而圖法不謹。猶欲肥之人。而日飲瘠藥也。知計之主。於一錢之入市。重幾何。精幾分。皆爲著文明白。範而鑄之。是曰制幣。此實與置監市司。價之官同。皆主杜絕奸欺。使民相任而已。

以精難難於審重輕。而所繫亦重。故制幣先有官印。官印者。課其精幾分也。印其一方。不漫全摹。猶今英國銀器有師子頭印。西班牙金銚有庫印。取以杜僞雜而已。古之用金。以重計。不以枚計。傳載亞伯拉罕買麥克非拉田於伊佛狼。以白金四百希

格爲價。此猶支那之用銀兩矣。英國當撒邁種人爲王時。收賦於民。任土作貢。不以泉幣。至威廉滿國造邦。乃以幣賦。然是時主藏所課入者。仍言重不言枚也。久之乃定制重幾何。精幾分爲制幣一幣之面背。像王面。紀年月。通印之。時或爲邊數極。以絕雜僞摩銘者。夫而後國幣齊一。價以枚稱。衡驗之煩。率無事焉。

泉幣之等。其始皆即重以爲名也。羅馬之幣名亞斯。亦曰滂圖。滂圖者。磅也。重如其名。蓋精銅一磅也。英國之幣名鎊。鎊即磅也。當義都活第一時。重如其名。得白金一臺磅。至顯理第八之十八載。始定制。造幣用杜雷磅。杜雷者。法國邑名。當時歐洲懋遷。法國最盛。而杜雷爲諸市輻湊處。故其權量各國通行之。法國之幣名利佛。利佛亦磅也。當察理第一時。重如其名。得白金一杜雷磅。蘇格蘭與英吉利分治之世。自亞烈山大第一至魯勃德布魯斯。鎊制與英同。英法蘇三國皆有便士。始亦權名也。二十便士爲一翁斯。故一便士者。二百四十分磅之一也。鎊便士之間。有先令。亦權名。然其重時升時降。無定程。不若鎊便士之可準。法古所謂銖。即先令。易五便士有

時十二或二十或四十不齊如此英當撤遷時每先令作五便士然亦時變與法互市不能不隨法爲遷移矣法自察理第一以來英自威廉第一以來鎊先令便士三幣相受之率無大變改者變者獨其值耳吾嘗謂各國君王多貪無信務欺其民故制幣以重名而其重日削所可考者羅馬末年亞斯之重不過二十四初制之一雖名涉圖半翁斯耳法國最甚後之方前僅六十六之一蘇格蘭次之三十六之一英最善今鎊方古猶餘三之一焉蓋其君操制幣之權則用仍名變實之術以與其國人相通此其所以爲聚斂之事也顧一時所造之輕幣其君不能獨用也將必與其民共之民亦操是以轉相給償通納賦莫不以此其負彌多贏得彌厚至使編戶齊民貧富易位雖國經干戈水火之禍變不如是之甚也皆居上無厭階之厲已

案合觀斯密氏之論則泉幣之爲用可知已泉幣之爲用二一日懋遷易中二日物值通量此不必定金品也而金品之泉幣有四德焉一曰易挾二曰不腐三曰可析四曰值不驟變然自通商日廣而天下之礦產日多此第四德亦難言矣國

家制幣之要道二。一曰銖兩數均。二曰精雜齊等。由是而生三善。一曰便事。二曰止奸。三曰美俗。夫泉幣所以名財而非真財也。使其所名與所與易者亡。則彼三品者。無異土苴而已。

篇五

論物有真值與市價異。

言物之貴有二義焉。有以利用言者。有以交易言者。物每有利用甚宏。生事所不可無。而不可以相易。空氣水土是已。亦有易權甚大。而利用蓋微。珠璣寶石是已。夫欲明交易。先辨三理。一物以何者爲真值。真值以何者爲差率。二凡物之值。不僅一事之所爲也。必有數事焉。叢而爲之。三物自爲言。則有真值。以之入市。則有定價。一物與物相易爲值。與泉幣相易爲價。後仿此一價時高時下。非無故而然也。明其故而後。物價之情可得見矣。以下三篇。即言三理。其理既隨。其詞自繁。理隨則有待於讀者之專精。詞繁則有待於讀者之無厭。能專而不厭。而後斯理得共明也。在不佞亦

勉爲其難而已。請先論物之真值。

案空氣水土三者。有時亦可相易。正文云云。特言其大凡而已。又物值無自言之理。斯密此說頗爲後人所改。

民之生也。皆有其所需利。新悅者。而貧富之等。即以享此之權力爲差。故化進而分功繁。民之所享。待於人者。日益繁多。產於己者。日益專一。其貧其富。一視其取功致物多寡之率而已矣。己之物甲。出以功力者也。以易他人之物乙。則彼出乙之功力。宜與我出甲者相當。是名爲值。然則功力者。物相爲易之真值也。而百產之值。皆可以功力第高下矣。

人情徂於習。則昧其本然。故獨視金銀銅三品爲財。而萬物皆以此計貴賤。一若非泉幣莫可貴者。不知始也。百產之登。非力不辦。其不由三品以市諸富媼明矣。即至今日十室之中。粗者械器。珍者珠玉。溯其元始。非力曷來。始也以力致物。今也積力於物。及其未毀。斥以與人。或易物焉。或得錢焉。自我觀之。其所得者。必費於是力者。

也。然則今之所爲，不過假前積之力，以節吾今用之力已耳。何則？假使無物可斥，而吾欲有其錢物，其必奮吾今有之力，勞而後能得之無疑也。

郝伯斯曰：財者乃權，雖然，權亦多物矣。有使衆之權，相之坐廟堂以進退百執事，是已有威衆之權，將之主兵柄以戰勝攻取，是已，斯之爲權，不必有財者之所能得也。然則有財者之權爲何如權乎？曰：能致物而已。其致物云何？曰：致他人之功力與其功力之所成就而已。入五都之市，其列肆而待沽者，皆功力之積也，故其致物彌廣者，其稱財彌雄，其積力彌多者，其爲貨彌貴。

夫物既有真值矣，入市之頃，何不準此以相易，乃更云與市價異者，何也？曰：論物值之所由起，固當言功力，而人未嘗用此定市價者，則較物所積之功力難也。今使執功力以爲準，則將以勞力之人數定乎？抑以用力之久暫殊乎？而無如二者可以較同事之人功，而不可以齊異曲之能事也。有勞逸焉，有巧拙焉，事固有一人之爲難，率於十人之爲易，又有一舉手奮舌之技，待十年數十年勤苦服習而後能者，是之

差率。又烏從而課乎。是故物之相易也。其值其價。皆取定於兩家當市之評。甲仰而乙俯之。乙出而甲入之。商權抑揚。至於各得分願而後止。夫如是者。謂之市價。市價必不皆真值也。而交易常法。必待是而後行。

案斯密氏以產物之功力爲物之真值。值之高下。視功力之難易多少爲差。其言雖近理。然智者千慮之一失也。蓋物無定值。而純視供求二者相劑之間。供少求多。難得則貴。供多求少。易有則賤。方其難得。不必功力多。方其易有。不必功力少也。一畝之地。處僻邑邊鄙。價數金而莫售。及在都會之中。雖萬金而爭買。此豈有功力之異耶。一樹之果。向陽者以甘大而得善價。背日者以小酢而人棄之。此豈又有功力之異耶。故值者直也。兩相當之名而對待之數也。以功力言。則物物所獨具。而無隨時高下之殊矣。此所以後之計學家。皆不由斯密氏物有真值之說也。

且交易之事。以物易物者多。以物易力者少。多則微而易喻。少則微而難知。物實物

也。力懸意也。故計物之值。以功力多寡言。不若以異物之多寡言。何則。取便常智。順而明也。

然此猶是國法未立泉幣未行時也。至國法既立。泉幣既行。則凡物入市。皆以易錢。罕以易物。屠者欲得餅酒。不復持其肉。以與餅師釀者爲易也。彼方售其肉。以得錢。更持其錢。以求餅酒。夫如是。則其所出。以爲易之肉。與其所易之餅與酒。皆習以錢計而便之。其名值也。曰吾肉每磅值三便士四便士。不曰若干枚餅。亦不曰若干斤酒也。是故泉幣既行。則凡物皆名錢。是爲物價。不僅不以產物之功力言。且不以所當之他物言也。

夫天下既皆以錢名物矣。吾論物值。不以錢而以力。何也。蓋惟已不變者。乃可以較物。錢之爲物。不能不變也。錢必以金銀銅三品爲之。是三品者。其值之變化。與他物同。有時易得。有時難求。故有時而貴。有時而賤。總天下而課其盈虛。視其時礦產之多寡。肥磽而已往者。美洲新通金銀二礦。所在多有。采運致之。不甚費功力。故其時

金銀之值參昔之一物產之費力少者其取力亦少其易物自不多而俗不曰錢之賤乃曰物之貴此所謂固習者也三品之變如此因而爲泉幣之變又如此設用之爲物值之程何異古者以肘量長短以撮量多寡哉隨體爲異其不足整齊萬物較差等明矣至於功力則不然功力幾何無論何地何時自勞力以產物致貨者言之一耳精力肢體如平時工巧便給相若一功之程其所服之勞苦與其所不得自由之情一也其庸固時有高下之差然此其庸變非其所施之功力變也大校而言費力多者其物貴費力少者其物廉惟功力有恆可以爲物值之準以功力言者物之真值也以三品泉幣言者號爲價者也號爲價者市價也市價不足定貴賤之實也

產一物多一貨使其功力從同則勞力者視之如一。是固然矣。然自雇役者視之則有時而多與值有時而少與值故力役與百貨等亦若暫貴暫賤無定程者不知此乃所與以爲值者之變而非力役之能變也是故以常法論則力役亦有真值市價

之分。眞值云何。爲一日之工。而一日之飲食。與凡生事所必不可少者是已。市價云何。一日所得之錢。是已。勞力者之優絀。貧富。與眞值有比例。與市價無比例也。夫言物力。設爲眞值。市價之分者。非虛爲精審。無益事實也。蓋其異不可不知。知者於人事有大裨。譬如有人買田。而約歲收租若干石。使其約納禾稼地產。雖懸千載。無大差。使其約折色爲金銀。數十年可以絕異。何則。禾稼地產。與力役有比例。而三品泉幣。其貴賤。可年月不同也。故約租稅以泉幣折色交納者。有二弊焉。國法常變。名同而實異。一也。三品之饒儉。有時輕重雖等。而易物之權大殊。二也。何言乎國法常變。名同實異也。制幣者。國家之權。使爲民上者。意謂吾存其名。而制之輕。可以邀一切之利。則幣日竄。而民又不能視輕幣與重者同也。斯折扣之矣。故雖租常如約。而歲入遞微。何言乎三品饒儉。有時而易權大殊也。前者美洲得礦多。而歐洲之金值減。地不愛寶。其減方長。然則租之以金論者。又日削矣。前者以枚言而少。後者以重言而亦少。

故租稅貢賦之事。制折色者便一時。而任土物者可久遠。往者英后額理查白十八年。著令云。國中學校田業。其三之二爲若干金。其三之一納禾稼地產。或隨時准照最近市廛時價。折色完納。據柏來斯敦言。此三之一者之所折納。已倍其三之二之金數矣。然則今之金較古之金。爲值不過四分得一而已。且此因由金值遞減。易權世微。而非由國法之敝。何則。英國制幣。自馬理亞至今。尙無有變。如鎊如先令。其精其重。皆仍舊也。假其金之本值日賤。而國家制幣。又復世輕。則折色之受損。愈不可計矣。蘇格蘭國幣遞輕。方英爲甚。而法則更甚於蘇。故法國折色之租。在古爲重。在今幾與無租同焉。

物值之不變者。莫如功力。穀次之。金銀爲下。民待食而後能出力役。故以若干穀易若干力。以廩課功。年代雖遠。其率略同。雖然。穀特較他貨爲有恆而已。遽謂其值不變。又未可也。大抵民食豐約。視治理之進退隆污。進者優於中立。中立優於退者。故曰以廩課功。不能無變。功之廩食變。則穀之爲值。又烏能無變乎。願其事以數理言。

之則二者相待爲變之率。有雙單之異。穀值之變也。視其與功力相待之率。此單率之比例也。他貨物之值之變也。必先視其與穀相待之率。而後及其與功力相待之率。此雙率之比例也。單者變簡。雙者變繁。故租之舍穀而以他貨物言者。其變大也。不折色之租。固較折色者爲可久。然必自其既久而觀之。乃可見耳。大抵米麥之值。棋與棋較。一百年爲棋。一其變常少。年與年較。其異轉多。而力役庸錢。常法不隨當年糧食之貴賤爲高下。而與通數年數十年穀食之平價爲差。而穀之平價。視金銀銅三品之易權。三品之易權。視其物在市之盈不足。其物在市之盈不足。又視升業之耗羨與運致之難易。此猶是以所費功力之多寡差之矣。夫三品之易權。棋與棋較。爲變常大。年與年較。爲變蓋微。有經數百年無甚相絕者。故其時穀食之平價。歷久相若。而力役庸錢。亦歷久相若。而其國之有大變故者。非所論也。至於上下數稔之間。客歲斗五十而今茲斗百者。則恆有之。當其斗百。不折色者之所收。自倍於斗五十者。而力役之庸。則不必因之而爲變。

吾之所求在得一物焉以衡量萬物之真值以審其貴賤之差由前觀之物之最公獨真不以地殊不以時異可以爲諸值之程準者獨人力明矣三品之不可用者以其棋而異也五穀之不可用者以其稔而殊也不以稔殊不以棋異或久或暫程焉皆可得其真者惟人力耳舍人力而欲衡量物值則定百年以外之物值金不如穀值同者其取力同也較數年以內之物值穀不如金價均者其食功均也三品者以世事爲盈不足五穀者以歲時爲饑穰二者均有所不通故功力者物值之程準也噫物貴賤而設爲真值市價之分與夫以金以粟以力評之之互異善計學者必窮其源不得已耳然知其義者於國家任土作貢則壤成賦之道或有補焉至於民生日用治產積居固無事此也同地同時物之市價必與其真值相爲比例也物之不出而勞者其價必賤物之索價高者其真值自大通一處之貨其真值上下之差視其價而第之可也雖然此必同地同時而後可或地異或時異或地與時俱異徒以價嗜萬物之貴賤者未有不失其情者也

地異則徒價固不足略物之貴賤。然而通商行貨之家。其操奇計贏。所謹稽出入者。又常在市價之閒。眞值非所論也。今假有商焉。通貨於倫敦廣州之閒。在廣之銀半翁斯。其易物與馭力之權。或大於在倫之一翁斯。夫如是以眞價言之。則廣人之有半翁斯者。實富於倫人之有一翁斯者。而物之在倫價一翁斯者。實賤於在廣之價半翁斯者。然而彼通貨之商。固不如是以嗜物論盈絀也。彼但知貨之能以半翁斯得於廣。而繼以一翁斯售於倫。則彼於此一入一出之閒。夫已業百贏百。一若倫與廣二地之銀易權相等也者。竊與折之分。純視乎市價之多寡。苟常計眞值哉。是故懋遷之巧拙。恆以市價之高低爲斷。而常人之治生。自且明而至闇。所言與聞。又無時焉不在物之市價。習之既久。視爲固然。斯天下攘攘熙熙。無一人焉能語物之眞值者矣。

今所欲講而明者。既在富財之原。則物求眞值。事不可廢。顧眞值必以人力言。而力役之庸。古及今貴賤之不齊。傳記不少概見。未由攷得其眞。獨五穀之價。雖不盡載。

間猶有一二存者。故欲定一物以爲群值之程準。又不得不降求其次。舍功力而取五穀矣。此亦爲其稍近真者。非曰其物果不變也。是審嗜物真值。多取其時穀價而言。職此故也。

易事通功。交利俱贈矣。而獨用一品之泉幣。必不便也。則造爲多品相權行之。夷考各國所用。大抵金銀銅三品。大者以黃金。次者以銀。又次以銅。若下品如鐵如錫如鏈。顧雖殊品並行。民常顯立其一。以爲餘品之程。名曰本位法錢。本位法錢立。餘品之幣之貴錢重輕。皆權本位而用之。此不必最貴最重者也。惟其群所前用者。是故圖法之事。改本位法錢難。往往利用之情既遷。而民猶樂守其舊也。

案歐美本位。先皆用銀。至近數十年。始改用金。而英吉利獨早。至於中國。則至今猶用銅也。

當布匿戰事之先。（考羅馬布匿之戰前後二役。前役起耶穌生前二百六十四年。是時羅馬民主正盛。與非洲北部之加達幾爭昔昔利島也。）羅馬用銅錢而無金。

銀之幣。先耶穌生二百五十九年。始造銀幣。名塞西特爾希。一此即史記大宛傳所謂以銀爲錢。錢如王面者也。一而銅者尙沿守以爲本位法錢。貨產貨物。皆以銅論。名亞斯。其銀幣塞西。枚以二亞斯有半爲率。故羅馬以多銅稱富。其負債者。曰家藏他人之銅。

羅馬解紐。歐洲北部代興。考諸傳記。皆原本用銀。而黃赤二金圓法。乃晚出之制。一歐洲北部日耳曼。特諸種。皆由安息絕黑海。溯達牛河而入普法。瑞典不列顛諸境。意者亞洲西域古行銀幣。其民雖散之歐洲。而猶沿守舊制也。一英國自撒遜種人爲王時。已行銀幣。而金幣自義都活第三始。銅幣自雅各第一始。國中貨產貨物。皆以銀計。其占貨稱若干鎊。不曰若干幾尼。蓋幾尼金幣。造於義都活朝。而鎊者猶羅馬之磅圖。本銀貨之名。今之金錢。當二十先令者。自本位法錢由銀而金時。乃有者也。餘國以銀計貨者。所由來同此。

歐洲諸邦。其泉幣多品者。其交易或貨納賦償負。必以本位爲計。如是者謂之法償。

法償云者如是之償乃應法也。英古法償皆銀幣。後議都活第三以黃金造幾尼矣。然不得用爲法償者蓋久金銀相受之率且暮有異官不爲定價也。銀幣折納當市者自爲之民償通以金不以銀主者勿受可也。評價相準而受焉可也。銅幣雖通行獨取與貴幣子母相權了暗零之數從未用爲法償也。故本位法錢立而殊品之用異三品之別不僅區區名字間也。

案以他書考之斯密氏此言頗失實矣。英始造金幣在宋理宗寶祐五年自此時已令民用爲法償而與銀折兌之率則國主時時頒令定之直至康熙三年猶用此法則其云不得用作法償久而官不強定價者誤矣。當時所造金幣皆幾尼無名銖者康熙五十六年始定幾尼枚當二十一先令與先令並用爲法償然每幾尼真值不足二十一先令之銀故民間納賦償負其款大者皆趨用金而先令則朝發夕毀或輸外國其獲留國中以資流轉者皆年久磨漫銖兩不及者耳。迨乾隆三十九年即斯密氏原當成書之前一歲議院著令凡民間納賦償負欲計枚

論通者不得逾五百先令。即三十五鎊之數。其過此款目。即當以重論還。而定五先令二便士爲銀一翁斯。數多則以重論。不以枚論。用磨澁者無所利。蓋欲救前弊也。嘉慶二十一年。令製幣官造銀幣先令時。於前之每鎊造六十二枚者。今造六十六枚以輕之。而二十一當一幾尼如故。卽以所餘之四先令。充匠器范治之費。而國賦亦陸行其中。蓋值百而征六五矣。此令旣行。而金銀二品。仍均法償。則民用之。其勢必反前弊。匿金用銀。而金幣將無由立。於是著令納賦償負。款逾四十先令者。銀幣不爲法償。其爲無限法償者。獨金而已。又令官造先令不得逾若干數。以救過多趨賤之弊。至銅貨二品。便士可爲法償者。不得逾十二當一先令之數。法丁不得逾二十四當半先令之數。蓋自是而英之本位法錢立。而國法之美。遂爲諸國最也。其私造私銷之弊。所以絕者。非其槩姦行法獨嚴也。英律凡官鑄金幣。由鋌而枚。毫不增損。而爐炭一切之費。皆取之先令便士之中。又爲精其范治。邊幕篆刻。齊一巧術。使奸民私造者。非大舉則不能。大舉則旋敗露。竊謂中

國泉貨之制。類弊已甚。苟國富強。則五均三府。當其所首事者。故詳著於篇。俾覽者有鑒焉。

獨至歷時既久。泉貨之制。百姓習知。而相受之率。不虞贖亂。乃爲立其定程。小大相準。如英往者。定每幾尼金直二十一先令。銀同作法。權相權行用是已。夫如是。則二品法錢。同稱本位。異名同實。多寡攸殊。民之用之。匪所擇也。

本位之關繫。獨見於二品相受之率。有更張時。試爲論之。今設前指幾尼先令二幣。其相受之率。有時降爲二十。有時升爲二十有二者。而國中一切會計。民之張簿契。徵皆以銀幣言之。則凡交易往來。通負相償之際。需銀幾許。無異平時。獨至以金計之。則二者絕異。於後率。則幾尼數少。於前率。則幾尼數多。如是。則常覺銀值無變。而金值時低時昂。是之謂以銀爲準。以銀爲準者。貴產貨物。皆以銀稱。而金雖經爲幣。實則等諸百貨之一而已。又設金爲本位。譬如某甲家藏鈔兩楮幣。上載存幾尼金幣五十。則無論何時。可取幾尼。同於此數。獨至持易先令。則二率大異。於前率爲千

於後率爲一千一百也。如是則若金有定程而銀無常值。是之謂以金爲準。以金爲準者。一切會計皆以金稱。而銀雖經爲幣。實則等諸百貨之一而已。故或爲本位。或不爲本位。名實兩殊。民之用之。有所擇也。

多品泉貨行。相受之率定。則諸品之值。常制於最貴者。今如銅幣。英之國法。便士十二枚重半磅。當未爲幣。此半磅銅。值十二分先令之七而已。及其爲幣。則此半磅者。當一先令。持此入市。隨時可易。且錢之摩損。上幣本較下幣爲輕。故國法未脩之前。幾尼之重大致相若。而先令則摩損輕薄者大半。使徒以重言。則實不副名遠矣。而此輕薄先令。每二十一枚易一幾尼。尙如其朔。持此入市。隨時可易。近者國法既脩。嚴鑄錢取銖之禁。且約徵收巨款。以重爲程。故幾尼金幣。民愈珍襲。而漫者用希。獨銀幣先令。則摩損如故。取易金幣。與新出於冶者同科。然則國法之脩。於金幣無所出入。而銀銅二品。則所當者皆過真值矣。

案斯密氏謂多品貨行。相受率定。則諸品之值。視最貴者。此說未然。往者計學家

馬格樂常敗之云國之諸金以事勢不同各自爲值金不能制銀之貴賤猶銀不能制金之貴賤也此在未成幣者固然在既成幣者亦然而固夫淺人不悟此理常欲以法貴賤之此國法之所以亂而民生之所以被其毒也考各國法償其用金用銀皆出於必然之勢自其國先者之著令有以致之蓋當金銀二幣並用之初大抵皆爲法償匪所賄重自相受之率以令定之斯二者時表時耗幾不能一曙而恆於是用是幣者亦時利時不利及真率與所定之率所差甚多則納賦償負之家必用其過實之幣而不及實者則或聚而鎔之或擲而輸之外國雖用峻典未由禁也今夫用金爲準英國獨先將受其益顧考其始非在上者豫慮而爲然也此因廢無五十六年所定二十一先令作一幾尼之率當時金幣絀此以銀爲計名過實者每幾尼約四便士有奇如是凡用金者值百贏一分六釐三毫強更遇雍乾之間歐洲金饒銀儉贏者愈多二品既均爲法償交易之事遂無往而不用金矣而後之人從而定之爲本位因勢乘便順民所欲者也至法德奧義諸

邦之用銀其勢正與英相反。法國於乾隆五十年其金幣名盧夷者。值銀幣名利佛者二十四枚。而每盧夷真值乃二十五利佛。又十蘇如是則納賦償費用金者。遇每盧夷折一利佛十蘇。交易之事遂無往而不用銀矣。既爲通行斯爲本位。又立制者所無可如何者也。至於近世始易銀爲金。故一國財賦之事。惟其理有固然。斯其勢有必至。決非在上者所得強物從我。倒行逆施也。

英國製幣官定制。每磅法金。一英制造幣法金約十二分之中精者十一而其一爲銅。若他品其不用純金者。以金純則柔摩損愈易。故舍純取雜。一造金幣名幾尼者。四十四枚有半。枚值二十一先令。而二十先令爲幣一磅。是每磅法金造幣四十六鎊十四先令六便士也。英權析一鎊爲十二翁斯。則金幣合重一翁斯者。當三鎊十七先令十便士半也。造金幣者無儲備治炭一切費。民持金銀抵局。受成幣與原金等。權色無抑減者。故號三鎊十七先令十便士半爲每翁斯法金之局價。法金法銀者。謂精雜應圖法者也。

國法未脩前每翁斯法金或銖或塊市價常過三鎊十八先令間至三鎊十九先令或四鎊者然以舊幣多摩損總其重或不及一翁斯國法既改每翁斯法金市價常不及三鎊十七先令七便士前則常浮於局價後則常減於局價以金易以銀易皆如是故國法改而金幣所范之金過於前時由是而與金幣子母相權之先令亦與之俱貴及他貨物價同前者所易實金亦緣此而多第貨物市價之低昂所由來者多且遠其差數微而難見耳

又製幣官定例每磅法銀造銀幣名先令者六十二枚枚值銅幣十二便士故每翁斯五先令二便士爲局價國法未脩前法銀市價時低時昂自五先令四便士至五先令八便士不等而五先令七便士爲常率國法既改其價不逾五先令五便士或至五先令三便士蓋國法改而銀銖價跌然未嘗如局價之微也

觀國幣三品相受之率知銅幣所當遠逾本值而銀幣所當則較本值爲不足歐洲中原如法如荷蘭之國大較金銀相受其率十四而英則十五之則以銀爲計金之

在此貴於中原也。顧英之銅幣所當雖過而銅之市價不因以貴。銀幣所當雖過本值而銀之市價不因以廉。銀銖之易金銅塊之易銀皆守其通行常價也。

考威廉第三朝脩改銀幣圖法而市中銀價仍較局價爲昂。名理家洛克以謂此緣國家徒禁銀幣外輸而不禁銀銖外輸之故。國中銀銖少而銀幣不乏。此市價所以昂於局價也。然洛說亦有不盡然者。蓋民之日用銀幣自較銀銖爲急。法宜使既成幣之銀貴而未成幣之銀廉。且今日之律亦許金銖出口而禁金幣外流矣。市之金價不聞坐此而貴。大率皆在局價之下。何耶。銀成幣後其所當之值以金計之實在本值以下。而三品之值又皆取衡於金。前之脩改銀幣圖法既不能使銀價因之而跌。與局價平。則知金銀市價皆非法之所能軒輊者矣。

案銀成幣後所當之值以金計之在本值下。特當斯密時如此。今大相反矣。又英自嘉慶二十四年金銀幣出國之禁皆弛。

夫銀幣所名既劣本值。設英製幣官收回摩損之銀幣而悉易以足重新造者。將見

一幾尼所易之二十一先令。是中所有之銀。方之在市所買之銀。鉅爲優。民之趨利。猶水就下。則將收聚先令。鎔鑄成銀。由鉅易金。由金更易先令。數番之後。獲利孔多。雖嚴禁防。姦必不止。是故欲救厥弊。非於二幣相受之率。詳審更張。必不可也。

詳審更張奈何。曰。真若更造銀幣。爲之制輕。制輕云者。謂以金計之。先令所名。浮於實值。而定幣銀法。償不得過二十一先令。當一幾尼之數。以杜民之取巧用輕。譬如今之銅幣。便士所名。大過其實。而姦巧不遠者。亦以法償立限。不得過十二枚故也。誠如是。則幣銀雖輕。而民不病。有子母相權之便。而無趨利不平之憂。制之精詳。莫如此者。計以此爲不便者。獨民間鈔店面已。彼之爲業。造鈔售財。貸財取息。最處挾鈔者。持據壟集。立案見錢。則常用巧術。以展宕時刻。陰資轉輸。其術常以最小銀幣名半先令者。徐徐給支。前令誠行。則爲法償所限。須支幾尼。轉注無時。勢必多儲金幣。則所貸以取子錢者。隘矣。故不便之也。然而主計者。安能以一業之私不便。而廢一國之公便乎。

案今英與各國用金本位者皆用此議先令法價以四十爲限不逾二十一也

一爲新法金易三鎊十七先令十便士半者局價也當國法精明稍權重一則在鑄在幣銖兩齊均五雀六燕匪所棄擇矣雖然金既成幣方未成者便給爲多且轉鑄爲幣即無角尖之費而民之持金抵局須數七日始得領幣當官局工殷則閱數月者有之停金在治子錢不收此之延宕不殊抽賦故金之在幣貴於在錠也前議欲救鎔毀外輸之弊法宜銀幣制輕而立價限乃今觀之不必制輕但使一如本值則一時銀錠市價自比局價宜低而前弊已絕況今市中行用舊造先令銀幣強半摩漫削薄而相易之時與新出於治者乃無別擇耶

進而論之設造金銀二幣時益以制幣之費則在幣之金彌貴於未成幣者此如范金爲器價逾其坯不徒鎔毀姦絕國幣亦不至外流卽有時開出邊關轉胸之間勢必自返蓋其制雖精異國用之計重估色與未成幣者等故其易權常過而齎以返者常有所贏也往日法國造幣官鑄之費值百取八其外流者皆自歸也

黃金之價有低有昂與百貨無以異也其所以低昂之理亦與百貨無以異也海陸之所洪沒塗飾緣繡之所銷糜在幣在器之所摩損散之難以見聚之則其多是故國不產金歲必有輸入者以彌所耗而金商之運籌逐時與他商又無以異大抵計求爲供而已矣彼竭其智慮而爲之而有時過不及者供與求之間相劑不易故也假一時所供者過於所求彼不能運以復去也於是甫減於經價而售之又假一時所供者不及所求則彼將翹之過於經價用以獲利此不運之驗也故設國中金銀市價連歲相若或較局價常盈或較局價常不足則知此盈不足而恆之故必在其國制幣之中其名之所當有常強常弱於其實者而後有此效凡事之理因恆而後果恆

泉幣者百貨之權度也必泉幣審而後百貨之貴賤可論猶及寸定而衡萬物之長短可差如英四十四幾尼有半之幣常當一磅之法金如是則此金幣無論何地何時皆可爲物價之權度設經摩取銷抑日久薄削不惟成輕且所輕不一則難爲權

度而操奇計贏之衆其計利也常不以名而以實故常視所與買之格之何如以制爲其價王者徒標其名而陰蝕其實固奚益哉

世其六先令八便士與今之一鎊等名異而實同也是書所言物價皆以實不以名案前篇因論真值市價之殊而及泉幣之制其於世輕世重之由與夫推行盡利之效可謂詳晰矣顧其中多舉英制又與其國今日國法微有異同故見錯出讀者或病其紛故今彙括於此以便講斯學者之考論焉今案英法二國泉幣古皆用銀而以一鎊爲單位此猶古黃金之稱斤今紋銀之稱兩皆以重行也未嘗以一鎊爲造幣者造幣初制乃取銀一鎊析之造二百四十枚號便士而總十二便士名先令由是而二十先令爲一鎊曰先令曰鎊皆總便士之數以重爲名無專幣也洎元大德四年義都活第一析一鎊爲二百四十三便士以征其民自茲以降代有所增至額理查白當有明嘉隆間析爲七百四十四枚仍名便士則愈無益矣蓋以一鎊之銀作三鎊二先令用也循是而計之故每鎊新銀得五先令二

便士此所謂法銀局價者也而二百四十便士猶號爲磅實則七百四十四分磅之二百四十而已。關於三分之一也。磅與鎊之分自此始。有明之季。察理第二爲王。當時其民往非洲西部開墾者日衆。多挾金歸。乃造幾尼金幣。幾尼者。以得金之地名名其幣也。幾尼初制。以當二十先令。猶今之金鎊。然名不及實。如篇中指而格物碩士奈端適主鼓鑄。建言幾尼真值。過所名者八便士。因於是議院定其率爲二十一先令。而三鎊十七先令十便士半者。爲法金之局價。局價之定自此始。然金銀相受。時時時胸。不可測定也。既定二十一先令爲一幾尼矣。而二品同爲法價。不立程限。又其時銀貴。以是率計。每幾尼金幣。過其真值者四便士有奇。故其民爭用金幣以納賦償負。其銀幣先令。多經廢棄。或輸外國。此一時之事勢。而其流極至使通國用金。此英用金爲準。獨先諸國所由然也。然法價定制。至一千八百一十六年始立。蓋采斯密是書所言。與名理碩士洛克國幣不二準之議。其資策歷久成憲。乃如此。至於純雜之分。則後之金鎊。枚重一百二十三黍。又

六百二十三分黍之一百七十一（四百八十黍爲一翁斯）其中含精金一百一十三黍又六百二十三分黍之一其十黍又六百二十三分之一百七十則銅也。粗而言之十二分之十一爲淨金耳。此所謂法金者也。民間行用摩損至不及二百二十二黍又四分黍之三者不得爲法價。宜受者拒之勿受可也。至於銀幣先令則以一磅造六十六枚。如前所指此與銅幣便士皆取便小費。以與鎊先令子母相權。故所名故過其實。今者銀值大賤與金相衡。道咸間率十五今乃三十有六。則其過實愈遠。而國家取此爲造幣一切之費。而賦稅亦陰行其中。然其制民便之而違用不廢者。則以有償限故耳。

篇六

論物價之析分

民始合群。無占田亦無積聚。交易之事。舍功力則差率無由見。譬諸游獵之部。其殺一麋鼠。方之殺一鹿者。其難倍之。則一麋鼠應易兩鹿。事之資二日作苦而後成者。

其值倍於一日作苦之所成者。自然之勢也。又設彼事之作苦。其費精力過於此事。當其爲易。以是費力。是以可貴。故有一時之功。可以當他人之兩時者。又自然之勢也。又設彼事之成。所資巧習。過於此事。以是巧習。相易以多。蓋巧習非人而能也。或以天分之獨優。或以學久而後至。則其相易之所多。適以償其前勞而已。故事以巧力兼至而交易優者。又自然之勢也。群治既進。事之以巧力至而交易優者。於其廣領庸錢而見之。此文明之世然。而草昧之世。分功雖簡。勢亦不得不然也。

蓋生民之始。百產登成。皆資人力。是以酬庸享實。皆歸肆力之家。物既以功力之多寡。第其貴賤矣。則其相易之率。亦以功力爲差。舍此而外。無可論者。浸假乃有積聚矣。而生民之業。自耕稼陶漁以往。皆力作居先。食報居後。二者不能同時。方其力作。非先有以贍其口體。固不可也。則必仰於積聚者之家。積聚者斥其財實。以飭材庀工。是之謂母財。力作者被其巧力於材。以成器而爲天下利。轉而售之。所得溢於前費者。是之謂贏利。方其斥以相易也。或以泉貨焉。或以材物焉。或以力役焉。度不可

也。顧一轉之餘，其所收者必有以當原材之值，與夫力作者之餽廩。二者既得，又必有贏焉。乃爲前斥母財者之惠利。夫而後積聚之家，利其業而勸爲之也。是故天生品物，得人力以成熟貨，由生轉熟，其值乃贏。其所贏者，當分爲二：一資力庸，一爲本惠而原材之值，與夫力役之庸，皆斥積聚者所前給者矣。故使發貯興業之家，爲其事而無贏利，則工賈之業皆不行，使所贏與前斥者之多寡無比例，彼將常爲其少而不爲其多。

賅者曰：發貯治生者之贏利，非贏利也。特庸之異其名而已。蓋其人權責交重而顧慮者多，有督閫之勤焉，有指麾之略然，故其得利也，惟其功力。功力所得，則因庸也。謂之贏利，異名而已。應之曰：不然。贏之與庸，其物絕異，制其消長，不關人力。夫督閫之勤情，指麾之巧拙，固有攸殊，而制贏利之消長者，則別有物，不關二者。夫贏利者，視母財爲高下者也。今設有市，其中常贏歲百得十，治生之衆，以此爲期。甲乙二廠，甲產粗功，乙造細貨，廠各雇工二十人，其庸率歲十五鎊。如是則年各出庸錢三百

差謂酬是則已足也。其言一分爲二，出母財者之所應得，施力成貨者之所應得，是謂庸錢。出母財者之所應得，是謂息利。

案贏利可以兼庸而言，息利不能兼庸而言也。

然而未已也。合群之先，地無所專屬也。草昧建侯，分民分土，而天下之地皆私財矣。如是者，謂之地主。地主不必用地也，而常分用地者所収之實。山麓之材木，牧場之芻茭，數澤原隰之動植，凡其地之所自生者，當其未私，其有待於勞力者，不外采之、掘之、收之、漁之而已。及其既私，則采掘收漁者，不得勞其力而全有之也。將必有一分爲獻之私是地者，而後可采可掘可收可漁也。如是者，謂之租賦。萬物皆出於地，故物價亦常有一分焉。析之則租賦也，租賦者因地之私而有。猶庸錢之因於功力，息利之起於母財。

今夫計學之於物價，猶化學之於物質也。必析之至盡，而後其物之情可知。而公例可以立。租庸息者，物價之原行也。卽一物之價而論之，將見或此或彼，或僅一焉，或

兼三焉。而皆統於是三物者。方民群之初合。物價一有所甚。一有所亡。至質散文滲。則物產或兼三而成價。其大較也。顧租庸息雖不同物。而其始則皆功力之所出。故皆可以功力爲權度。

合三成價。觀於穀價最明。其中必有田畝之租賦。必有長年佃者之庸錢。與牛馬田畜之所食。凡皆庸也。二者之餘。則有農人所斥母財之息利。總是三者。而後穀價成焉。或將謂牛馬田器積歲用之。必稍稍耗。不有以彌勢。不可久。當其評價是在其中。則三者之外尙有物也。三烏足以盡之乎。不知此牛馬田器之價。亦乃合三而成。如畜養之場。必有場租。攻牧之夫。必資養食。而農家先斥其財以贖。是二歲終會計。亦望贏息。是則穀價之內。雖有小分以爲買生儲器之需。顧稱而言之。仍歸三物。於吾前說。何能憾耶。

麥轉爲麴。則價增乎前。以磨者之庸與坊主之息利故。麴轉爲餅。則價增乎前。以餅師之庸與號主之息利故。且麥不能自行也。由庚而坊。由坊而號。皆必有轉運者之

庸與夫畜是轉運者之利息。故前二之外。又且有增焉而後可也。食既如此。衣亦然。麻之爲物。合三成價。與麥等也。而麻布之價。則必增。漚者紡者織者之庸。與夫各養其工者之利息。是故其貨彌熟。其積功彌多。以積功之多也。故其價之中。庸與息累焉。而常居其大分。所謂租者。相形渺矣。且方其積製造之功也。不惟斥本求息之家業也。後之所息。必鉅於其前。何以知其然也。蒸惠之微。鉅視母。後母大於前母故也。蠶諸麻業。畜織者之母財。必大於畜紡者之母財。畜織者之斥本也。必有以酬畜紡者之本息矣。又有以食其業之織工。夫而後能取其既紡之麻而織之。故曰其母財大也。母大者子亦大。故曰後之所息。鉅乎前也。

案前說必分功既細。其理乃明。假如群治未恢。分功不細。則斯密氏所指以磨工餅師與夫漚浹紡織之業。皆一家事耳。母子層累遞增之微。雖其事具存。難以見矣。

前謂質散文滋。則價兼三物固然。即在文物極優之國。必有價焉不能兼三。或得二

而無租或去二而得庸此實國文國之所同也。譬諸海魚其價之中獨函二物養漁者之庸與夫庀船網養漁者之息利海無租也。至於桑谿浚池水常有主則賦稅與焉。如歐洲各國漁魴之業是已。蘇格蘭小民於潮落時爭領海壩拾怪石其石有文章任刻鏤美而難觀者往往得善價此則獨以庸言矣。

案今日海亦有有租者

雖然。是不足以黜吾合三成價之說也。恆業之民斥所產者以與人爲易私其土者則得租生者爲者轉者則得庸二者既償必有人焉得其餘爲贏利分而論之凡物之值終歸是三合而言之通一國之所產亦會是三者無餘物喪其國財最其歲入而區其民之所分或得一焉或兼二三焉不異乎此此其所以爲養也是租庸息三者國富之源也民生之本也而凡邦用財賄莫不資者也。

民之能以三物自養者謂之自立之民國之楨幹也奮手足耳目心思之烈食其報者貴賤異而皆庸也其次則發貯蓄財以殖其貨則贏利矣治生者徒財不足以爲

贏也。將必有其經營之勤。與夫得失不齊之慮。贏利之中。所以報其勤慮者。爲庸。所以報其廢居者。乃爲息耳。民之獨以息利自養者。則子錢家是已。借財於人。謂之貸。以財借人。謂之貸。貸者擁貴而不自殖其貨。貸者受之。以爲殖貨之資。而酬貸者以息。故息者。所以市用財之權者也。而業之成敗利鈍。貸者當之。於貸者無與也。獨以租自養者。古有采地之君。與今之以田宅僦人者是已。南畝之民。田不已屬。所得贏利。兼息與庸。其受田也。猶賣者之資財。而報之以租。租者。所以市用地之權者也。而歲之豐歉。受田者當之。於名田者無與也。凡國之俸祿餼廩餉糈。自君公將相。以至抱關之隸。執戟之士。貴賤有異等。所受於國。於吾計學。皆名庸錢。小民固勞其肢體。而聖人亦竭其心思。以功力食於其群。一而已矣。是故一國之度支。所以爲俸祿餼廩餉糈。以至振貧之粟。養老之糧。工程之所費。國債之息財。或遠或近。亦皆於前三物者是取。外是無所於取也。

案國之分三物。以賦於其民者。唐之租庸調是已。漢舟車之算。則豫征於贏利者。

而楊可告緡則兼三物而取之他如孔僅之鹽鐵桑羊之均輸則以天子爲工商如王莽所稱周官之賒貸宋王安石之青苗又以天子爲子錢家非食租衣稅之事矣

三物各有專屬則顯而易別三物同歸一業則微而難分故其所稱往往相亂今如新占地畝自墾自耕如是而收粟食之餘皆其所有此租與贏合也而人悉曰贏利忘其中之有租北美古巴墾荒之人斥母財斥田器飼其僮奴馬牛以耕已所分地於其歲人皆計贏而止常農之於田事也督耕矣而扶犁播籽耘耨之事皆與庸者共力作如是而收納租廩佃之餘息與庸合而彼悉曰息利忘其中之挾庸故前事租與贏混後事庸與息混此之相亂不獨農也雖工亦有之斥其母財以具其業之材與器方其力作資前儲之財以供日食如是成貨賣於市以售之其所得者息與庸合而俗通曰贏利是息與庸無辨也種果者治隙地以藝樹焉一人之身爲園丁爲藝者爲果主人是其產兼三物也然其得利通謂之曰吾之庸錢是三者混也

治化既進。則物價全出於功力者少。而兼之以租與息利者多。故通國之所歲登較之原用之功力。所贏倍蓰。繼乃更以所贏食工役墾荒地。轉滯財。交相資以殖其貨。則歲歲之出。皆進乎前。數稔之間。法宜大富。而民生大舒。然而不能者。則害富之夷衆也。國有無名之費。而積蓄者不盡爲母財。有皆惰游手之民。而食積蓄者不盡有所出。而奇袤虛耗。一切無所贏之爲作。又無論已。此天下之所以富國少而貧國多也。大抵動惰愚智之民相待之比例率。國財之盈不足與物產之廉貴恆視之。

篇七

論經價時價之不同。

都市民業不齊。而各業之中。功力之庸與母財之息利。皆有常率。此其多寡饒儉之殊。由其群之有貧有富。其治之有進境有中立有退行。與其所治生業情形之互異。庸息如此。惟租亦然。係於民群之貧富與治化之進退矣。而其地勢之遠近夷險。與地方之豐瘠又主之。是故一時一地。庸租息常率者。生於理勢之自然。非人意所能

輕重者也。設有貨物，其名價也。計本量委，以與是三者之常率相準。如是之價，謂之經價，亦曰平價。

案古之均輸平準常平諸法，所欲求而一之者，皆此所謂平價者也。如漢書食貨志載莽令諸司市，常以四時中月實定所掌，爲物上中下之賈，各自用爲其市平。毋拘它所。衆民賣買物，周民用而不費者，均官有以考檢其實，以本賈取之。毋令折錢。物以貴過平一錢，以平賈賣與民。民賤減平，聽自相市。以防貴賤者，其求平價之術，不知通三月之市價而取其平乎？抑會三物常率而爲之也？惟其所謂本賈，則合三而成者耳。

物以經價交易，則售者之所得，適如其貨之真值。真值非他，所以致是貨入市之全費也。惟是市中常法，售貨稱及本者，多不賤售者之贏利而言。然使貨售僅得本價，無常率通行之贏利，則其人固已折錢所得者非經價矣。設彼移此業之母財以貸人，則必有應得之息利也。且此贏利，若人所有爲而治生者，當其治辦一貨之時，諸

工之餽廩。尤作之鋪食。駝馬之豆芻。不斥畜藏。無以事事。即其身家奉養之豐儉。亦逆計所應入之常利以爲差。使貨出祇如所謂本價者。售之是種種費。烏從出乎。故其交易爲折錢。而不可以俗之所謂及本者爲經價也。

故經價者。貨物可售最廉之價。夫當市所售。劣於經價者。有之。願其事可暫爲而不可久處。使其久處。則必有所牽率不得去者。否則不崇朝其業徒矣。故曰經價者。貨物可售最廉之價也。

當市所售者曰時價。時價與經價異。或等或過或不及。視供與求相劑之間。物求售者謂之供。人欲得者謂之求。雖然。欲得虛願。不可謂求也。極樓之夫。每懷狐白。貧寒之句。亦望肥甘。此曰虛願。不足致物。不足致物。則於物價無驗。故有驗之求。必顯力相副。能具經價。以分酬貨之租庸。若息利者。夫而後與供者之物有相劑之效。計學之事。不計無驗之求也。

使供之數不及乎求之數。則將有力勝者。甯出過經之價。不使顯虛。供少求多。則求

者競競而時價優於經價矣。價如是者，謂之騰。騰之數視供者所少之幾何。與競者願力之大小，願力等矣。則視其情之緩急，國城之內，饑饉之年，生事所資，什佰往日，以供者有限而求者至多故也。

使供之數過乎求之數，以經價求者無多，而急售者衆，求少供多，則供者競，競而時價劣於經價矣。價如是者，謂之跌。跌之數視供者所過之幾何。與競者渴財之甚否，所儲之堅脆，易腐敗否，易失時否，設其衆之跌尤無算，逐利折閱，或至破產蕩然，大抵坐供過所求已耳。

使供之數適如乎求之數，則時價與經價平。求者以貨之足供，無待過經之價而後能得，供者以銷之甚易，亦無待於劣經之價而後可售。蓋有供之競，則勢不能騰；有求之競，則勢不至跌。此懋遷之最爲平善者也。然其境爲都市所絕無，近似則有之矣，無少出入者，未嘗見也。

案漢書食貨志：國師公劉歆言，周有冢戶之官，收不饗與欲得，所謂不饗即供過。

求者所謂欲得。卽供不及求者。費曰。易稱。豐多益寡。稱物平施。書云。楙遷有無。周有泉府之官。而孟子亦非狗彘食人之食。不知斂。野有餓莩。而弗知發。故管氏之輕重。李悝之平糴。宏羊均輸。燕昌常平。亦有從徠云云。皆供求相劑之事。古人所爲。皆欲使二競相平而已。顧其事出於自然。設官幹之。強物情。就已意。執不平以爲平。則大亂之道也。用此知理財正辭。爲禮家一大事。觀古所設。則知其學所素講者。漢氏以後。俗儒以其言利。動色相戒。不復知其爲何學矣。

曰。供求相劑者。謂任物自巳。則二者常趨於平也。夫供求相等。有實事所絕無。而勢之所趨。又常以相等爲的。今夫供者之家。或以其地。或以其力。或以其財。而致資生之一物。利在使供之數。常勿過求。求者之家。所利反此。今使供之數過求。則時價劣。經價而擡者。三物之中。必有一焉。受其敝者矣。受其敝云者。其所得不能如其時其地通可得之常率也。使其在租。則有地者將改。而他藝。使其在庸。則力作者將徙。而他治。使其在息利。則斥母者將變。而他事。是故時價劣。經而三物之一受敝。受敝則

遷遷則供者絀。供者絀而後與求者之不及相劑。供求相劑。則時價與經價趨平。自然之勢也。又設反此。使供之數不及求。則時價優經價。而需者三物之中。必有一焉。享其休者矣。享其休云者。其所得不止如其時。其地通可得之常率也。使其在租。則地將更闢。使其在庸。則工將更集。使其在息利。則財將更出。是故時價優經。而三物之一享休。享休則徠。徠則供者衆。供者衆而後與求者之過相劑。供求相劑。則時價與經價趨平。又自然之勢也。是故通而論之。物價如懸擺然。而經價者擺之中點。擺之搖也。時前時卻。而地心之吸力。常使之終趨於中點。而成靜。物價之騰跌也。時低時昂。而供求之相劑。常使之終趨於經價。以爲平。觀於懸擺。而物價之情可見矣。故曰。任物自已。則供求自趨於平也。

惟供求之相劑。故力作懋遷之事。常準求以爲供。通數歲而估之。視所銷之多寡。以逆定一年之所出。毋使過求。致病其業。此發貯運籌者之常道也。物產之登成也。有事恆而所登之物產亦恆者。有事恆而所登之多寡至無恆者。譬諸農功。一國之中。

數稔之際。扶犁把鋤。畝之手指相若。而禾稼酒漿油蒸果蔬之所出。歲殊續耗之業。則不然。苟手篳足機之民。數不變。將麻枲絲園之勛。準去歲而可知。故農民之酌求爲供也。最數歲之所出。稽平數而爲之。願當歲所收之實。往往有甚過甚不及者。故其供之於求也。亦或過焉。或不及焉。此時價之所爲常變也。織者之業。事同則效同。其率求劑供易也。故其時價有微歧而無逕庭。此夫人而知者矣。蓋織業之變。視求者之數。而農業之變。視求者之數。又視天時之不齊。

時價之於經價。或優或劣。則成價三物。將必有享休受敝之家。此必至之驗也。然而有輕重焉。以常法論。則在庸在息者常重。而在租者則輕也。使所納之租。不任土物而爲泉幣。則任產物時價之騰跌何如。於彼無所出入也。獨至任土作實。則物之入市轉售。自亦隨時價爲貴賤。故田主以田授農。其名租也。必最數稔十數稔之所出。稽其平數而爲之。未嘗以當歲之時價而名之也。

價有低昂。其損益於庸與息者。甚於租矣。而二者之中。又時有所畸重。有時而專在

息有時而與在庸供求不齊。在貨者則歸息。在工者則歸庸。此易見者也。今如忽逢國帛而黑呢大昂（西俗以緇元爲喪服）黑呢常法在市者少。買之前倂此貨多者。得息自厚。而於織呢之工則無與也。市所欲得者。已成之貨。非成貨之工也。而縫紉之工。其庸乃貴。製爲喪服。求之過供。又在工也。雜采縑絹。價皆大跌。業此之工。坐以耗虧。供過乎求。此又在貨。喪期六月。或至一年。織染諸工。庸以之薄。工之與貨。皆不饒也。此以見價之低昂。變在庸息。或此或彼。視供求之不齊。在工抑在貨也。

前謂任物自己。則供求二者自劑於平。而物價常趨於經價。此猶水之歸海。曲折赴此而後爲平。公例大法。固如是也。然有時以人事偶爾之不齊。地勢自然之有異。抑或政令約束之所爲。每能使一時物價。大過乎經。歷數十百年而不變者。此又不可不知也。吾得次第言之。

貨物入市。使有力而欲得者日多。則時價或大逾經價。彼斥財而殖此貨者。必謹秘之。蓋使舉國而知其然。則指本與角逐者將衆。始則供與求平。而贏利薄。繼且供過

乎求而價減經矣。此所以必秘其情也。使其市場距出貨之鄉甚遠。則其積歷年不泄者。有之用長享其厚實。然而往往甚難。而所得之厚實。亦不易久享也。

上之所言。商之秘也。商之秘。不若工之秘。工之秘。方之商之秘。爲難。誰而易私。假有染工。得一新訣。設色佳而用料廉。因享厚利。使其謹之。則其利可資其終身。且可傳之後業。此其利而優者。乃其庸也。然以其斥本飭材。而後術有所附而施也。則往往謂之贏利矣。前之二事。皆起於人事之偶然。然方其用事。則物價不得趨平。有至於數年十數年之久者。

地有其土壤之性。其方所之居。而最宜於一產者。一國之地。情勢與埒者。無多。則供常劣於求。其利爲所獨擅。蓋求之者競。則其產之價過經。而地偏產狹。專之可數百年而未已。第其因既起於地。故此過經之利。其果必歸於租。此如法蘭西之葡萄田。往往一鄉一邑之中。肥磽正同。荒囷亦等。其租乃大異焉。而作治之庸錢。母財之息利。又與其地之常率。無大異也。此其物價過經之故。則起於地利之自然。使其因不

變則其果與之俱不變矣。

案自斯密成書以來。法國葡萄田地。價大騰躍。每闕克至千磅以上矣。

國家許工商以辜權之權。其效與商秘市情。工私方訣等。蓋辜權之家所以得利。在常使供不副求。供不副求。價乃逾經。而其業之庸息並進。故辜權專市。其效與任物之競者正反。任物之競。是謂自由生業。生業自由。則供求相劑。物價不期自平。而定於最廉之經價。辜權壟其所產。極於至昂之價。而後售。自由生業。能竭供者之廉。辜權懣懣必盡求者之力。過前則供者不繼。過後則求者莫徠。

他如工商各業之業聯徒限。與凡立章程使相競之家有數。而不得踰者。其事驗皆與辜權相若。蓋皆欲業者無多。塞平均爲競之門。然後視求爲供。常無使過。則價之逾經。歷時可久。而其中之出力得庸。斥財得息者。皆可較常率而優也。是皆緣政令約束之不均。故其得利亦與政令約束之行廢爲終始也。

案供求相劑之理。非必古人所不知。其發之精整如此。則斯密氏所獨到。此所謂

曠古之慮也。蓋當時格物之學。如夜方旦。斯密氏以所得於水學者通之理財。知物價趨經。猶水趨平。道在任其自己而已。顧任物爲競。則如縱衆流以歸大壑。非得其平不止。而辜榷之事。如水方在山。立之隄。輒暫而得止。卽以爲平。去眞遠矣。考字書。辜者郵也。榷者獨木之梁。故壅利獨享者。謂之辜榷。而孟子則譬之壅斷。大抵皆沮抑不通義也。又斯密氏謂辜榷之事。能使求貨者出最貴。不可復加之價。而自由相競。則物價最廉。以常法論之。其大例自不可易。然懲還理障。其效亦有不盡然者。今如荷蘭之香業。則以辜榷而價逾經。中國之官鹽。亦以辜榷而貴數倍。然如郵政一事。則歐洲諸國。轉賴辜榷而郵費大廉。國家歲賦。此爲鉅款。假使用民間信局。有必不能者矣。卽自由爲競。物價轉不能廉者。亦有之。如其業需母甚鉅。則所費逾多。英人最憎辜榷。故國中鐵軌。亦聽分行。然行者之懺。未聞因此而約。倫敦都市。候雇之馬車。幾百萬輛。然以車衆而雇分。雇分而懺重。此又盡人之所知也。故近世計學家察國策。設爲市場內外競之分。外競者。爭得市場也。

內競者同場而競也。謂外競可。內競不可。姑舉之以備異聞。非定論也。

時價之於經價。時過時不及。然過經者其勢可久。不及經者其勢不可久也。蓋虧折之事。人所不能。方其價不及經。三物之中。必有受敵之家。受敵折閱。勢必遷業。遷之多寡。亦與所不及之數有比例。必待求足勸供。其遷始止。而求足勸供。則時價必過經。假明矣。

逐利之工賈。常欲供不副求。以擅其利。則爲之業聯徒限焉。業聯云者。不使同業而買者過定數也。徒限云者。不使同業而工者多新進也。此其利皆成於一時之私。故不能無後害。當其業之盛旺。勦力者固以此而多得庸。及其既衰。力得者亦坐是而大失利。蓋其術既行。業皆有約。始也已不受人。終也人不已納。因衰徙業。乃成至難。則作法自斂而已矣。雖然。利之事可久。害之事不可久。故受業聯徒限之益。而價常過經者。可數十數百年。至於其斂極之不通盡業者之餘年而已。其子孫固可改也。改則各適時勢。視求爲供。以擇其業矣。夫至于孫而猶受其業之敵者。必其國之政

俗如埃及如印度之非理而苛而後爾。二國之俗。凡民之業。皆世守之。無論學業居位。闢土殖穀。作巧成器。通財鬻貨之所爲。皆子循父業。不得覩異物而遷。遷則爲犯教律之大者。夫如是。雖世異時殊。數世被其毒焉可也。

案斯密氏所譏埃及二國之事。正中國所稱三代之美俗。今中國以時會不同。幸而自變。彼高麗以區區國猶用之。然而其效可覩矣。夫因循守舊之風。固有其善。而自昧者用之。則治化坐以日偷。不徒不進而已。斯密氏之所發明。猶其小小者也。

此篇所論者。物有經價。而入市隨時價之或低或昂。或久或暫。皆有可指之由。供求相劑。其大較也。顧經之價成。本於三物。故經之價變。又視三者而爲差。而三者之差。則如篇首所云。視其群之有貧有富。其治化之有進境有中立有退行。故繼此四篇。皆就吾思力之所及。以推明諸變相待之理。一辨力役之庸錢。視何因爲消長。而此因之視本群貧富。與治化之進境中立退行者。其理何如。二辨母財之贏利。視何因

爲消長。而此因之視本群貧富。與治化之進境中立退行者。其理何如。三用力不同。則受庸異。用母不同。則贏利異。然而合全群之庸與贏而計之。則二者對觀。常有一定之比例。而此比例之率。既視用財用力者情事之不同。又視其群劃法行政之善否。獨於前所爲本群貧富治化之進境中立退行。則若無所相待爲變者。故吾又取此比例率。所待爲變之事。究切而言之。四辨租稅所待以爲變。與地產價值所待以爲高下者。其事維何。

篇八

釋庸

力不可以終勞。故受之以成貨。成貨者。所以報勞力者之庸錢。而使之可繼也。民之初群。無私土。亦無積畜。則成貨之實。皆勞力者之所得。未嘗有斥地具母者。與爲分也。使天下至今。常如是而無變。則如分功諸事。將使民力日益。爲之加疾。而成貨世多。庸之爲進。豈有量哉。夫如是。則百貨將皆日賤。蓋其所需以成之力日減。而相易

之量。又以所需以成之力爲差率故也。

雖然物實賤矣。而當此之時。必有物焉。民見其日貴而不見賤。今設有無數事。爲之加疾。十倍於古。而獨有一二事焉。今之成貨。其疾僅倍乎前。較二貨爲易。而純以所需之人力爲差。則前之一以易一者。今乃十以易二。明矣。彼操前貨者。覺異之以一易而足者。乃今以五而後得之。方存乎見貴。何存乎見賤。而不知實以言之。則古者之一。一日之業。今者之五。半日之功。是無間其貨之已成。人成。皆古之勤六時而獲者。今則勞三時而有也。其享物之利用同。而勞苦減半。夫甯非進歟。

案斯密此言。往往見諸實事。講食貨者不察。則於物價古今消長之際。輒亂失真。如在明初。英國可考者。鐵每噸價六鎊。鉛每噸價五鎊。今則前約五鎊。後乃二十鎊。然此僅以泉幣言。不得實也。欲得其實。則須知五百年以來。英之穀麥工庸。以民生日優。金銀日溢之故。其價增者九倍。以此而較。則鐵雖僅減一鎊。其值今之方古。祇什一耳。而鉛值以金論。雖四倍乎前。而實則廉至四分之一也。故徇名忘

實者不足與言國計。

且此爲初民之局。浸假而國有私土。家有積蓄。則其局變矣。是故勞力事全之事。勢不可久。且不待分功甚密。生財之能事大進而後然。前之所指。姑以見事理之本然。雖勿窮其流變可也。

土私則有租賦。租賦行而勞力者之入減矣。自扶犁破塊。以至納稼登場。中間數閱月。勞力者未必食其所已有也。則必有人焉爲之主。發其所積蓄者以食之。彼不能無所利而爲是也。故勞力者之所登。必有以復所前發者。而益之以贏利。贏利取而勞力者之所得又減矣。

贏利之所減。不徒農食之事然也。凡施力成貨者莫不如此。將必有斥所積蓄。以庀物材。贍餽廩。迫材被人巧。因以成器。而值增乎前。則廢居殖貨者之贏利也。即有時施力成貨之工。能自庀其材。自具其食。而無待於外。迫其成器。輸市得價。全而有之。顧此不外庸贏合一而已。彼既以一人之身。同時而兼二體。則其所得亦同時而兩

二物不得以一人受之。遂有其一而亡其一也。且此所謂無待之工。事不多有。見諸歐洲者。二十而一。即身爲兼。其自計庸。亦以常法。市然身然。餘則贏利。不因兼而得庸。輒多也。

案斯密氏所謂無待之工。乃自行具本者。自指鐵木諸作而言。必非佃作之農傭也。而原文之語稍混。遂來威克非諸家之駁。蓋田事以地主農家田工三家分營者。惟英與荷蘭爲然。至於餘國及南北美。則地廣者耕以田奴。地狹則占者自耕。而雇佃以耕者絕少。法國自耕其田者。四農得三。北美前以新闢地。廣人希。工庸極貴。非用黑奴。勢無從雇。故亦多自占自耕者。蓋田地母財力役。皆一家之所出。租庸贏三物。匪所分矣。即所指製造之工。今之英德製造公司。多用東夥通力之法。其法。歲終計利。庸息二物。先按市中常率分付。有餘。則斥母與出力二家所得。皆比例而增。不及。則比例而減。主傭休戚。益復相關。不待督察而動。事辦而兩家之利皆進。其事與斯密氏之曰。亦有不同也。

庸之高下。定於勞力與斥母者兩家之約。然受庸而勞力與出庸以雇工二者之利常相妨也。受者惟恐其少。出者惟恐其多。是故傭者常合群挾主以求其增。主者亦連約抑傭以爲其減。二者之爭孰與勝負。此不難見者也。主者之人數少則易爲合一矣。國家之法不禁主者之爲合以抑制。而禁傭者之爲合以把持。二矣。禁糾合索傭求增工價。議院有專條。主者公議減給工資。議院無專條。三矣。且相持之頃。主與傭固皆失業。然主之持久勞易。傭之持久勞難。山主農頭廠東鉅商。例有積蓄。歇業雖一二年。不必病也。至於勞力之傭工。仰手足之勤動。以贍其身家。其能數日不事者。固已少矣。能終月者益希。至於期年。則餓殍矣。是故究極爲論。主者之不可無傭。猶傭者之不可無主。爭而不下。誠兼敗而俱傷。而主固不若傭之勢急也。

案傭工索增工食之禁。英議院於道光四年議罷。而恃強凌弱率牽抑勒之禁。則如故也。

或有謂主合抑傭事不多有。傭合挾主乃所常聞。爲此說者。不徒不察事情。其於世

故蓋亦淺矣。彼以謂主少爲合者。蓋不知通都大邑之中。凡一業雇傭之主。雖不顯約。勢已陰合。務使業工所受。不得過見定者毫釐。知此之爲公利。則不待要約。固口守若誼盟矣。故其黨之中。設有一二寬大者。破例爲優。則必爲儕等所詬厲。其爲合之堅很如是。而外人不少概聞者。彼行其所無事。而此習之爲固然故也。但賃工之主。其於庸錢。不特不肯爲增也。有時且欲爲減。其爲此也。恆不動聲色。潛合而私議之意。合條成。乃與布露。當此之時。彼傭固未嘗不甚苦甚怒之也。而無如諸主家之勢已合。他適無門。則俯首帖耳。蟬聯故業。若無事然。而業外之人。靡聞見也。至有時不得已。約同業之傭。以相保持抗拒。亦有時未經抑損。糾合儕偶。先發求增。則必宣言糧食騰貴。抑云本業貿易繁興。主家贏利。於前已厚。傭工勞力成貨。法當優分。云云。前事保其固有爲守。後事爲其益多爲戰。爲戰爲守。事皆外聞。且其行事也。勢不能久懸。則譟譟喧喧。冀其早定。其智下。故其術左。其勢盛。故其事暴。求不輒得。則凍餒之災隨之。事之常聞。亦由是耳。願其時彼雇工之主人。亦未嘗不暴戾張皇。以與

之相應也。引條約陳禁令。憑官長之力以爲己資。故其究也。傭者雖力竭聲嘶。於所欲得者無毫末之益。蓋一則以官吏之居間。大抵抑傭而扶主。二則以兩家愚智相懸。其行事有幽莽審詳之異。三則以傭貧主富。待食勢逼。爲合不堅。而終於折入。徒聞官取爲首。某人某人。加嚴罰以懲效尤而已。無餘事也。

主與傭爭。其勢固常勝矣。然而裁減工食之事。必有所底。減之而過。欲其可久。雖最下之傭不能。此所謂最低庸率者也。蓋民之勤勞。所以爲食。亦待食而後能勞。然則至微之庸。非有以贍其口體者。固不可也。不甯惟是。使勤劬者之所得。僅贍其一人之口體而無餘。則一傳之後。傭種將絕。其事之不可久。又明。是故使其事相引而彌長。必贍其口體之外。兼有以畜其室家。俾娶妻而育子。夫而後勞力之衆。與有地有財者成相養之局而不廢也。往者計學家庚智命嘗計之矣。使賃工之傭。一人而有二子。則受食必倍於養己者。而後能傭。有一婦。婦固可自食其力也。然以有賴子之事。故補短絕長。通一人所得。僅足以自給。常法貧家四乳而兩育。而一夫之食。可以

濟四嬰稍長則一壯之糧可贖二少故通而計之贖兩身者天下至穀之庸也且勞力者以一人而兼兩食苟自其所產者而言之不爲過也夫功食相準奴虜最劣然課其所產之值當身無疾病時未嘗遜兩身之食者而雇傭之功或相倍蓰終未嘗遜奴虜故曰不爲過也庚智命之說如此自我觀之則最下庸率應以兩身爲計與否姑勿定論特世欲匹夫匹婦力作而長子孫則雖至賤之工至穀之庸必有餘於二人之自養夫固不待明者而後能知之矣

庸之常率如此然有時事會使然不待糾合求增而庸率大進者但使國勢日恢興作歲廣則其需勞力受庸之衆皆以日急今茲所雇方之昔歲潮長川增功多手寡相競求傭而廩優者附所謂主合抑傭之局不攻自破國中庸率舉以優矣

蓋力役爲物與百貨同體庸者力役之價也庸之消長視供求相劑之何如而求之多寡視興事母財之多寡無積蓄固不足以養人而滯財雖衆亦無益於勞力之民故必飭材庀工而後其財稱母而母財之益斥由二塗焉一曰資生而有餘二曰資

事而有餘。養生有餘者。如田主債主與凡有財者之家。自隱其歲入。以贍一家之經費有餘。則或全或分。將斥此餘。以益收僮指。其益之爲事。與餘之爲數。有相待者焉。自然之勢也。資事有餘者。無待之工。如織工如繅匠。自隱其歲入。以購材具食有餘。則將斥此餘。以益雇傭夥。其益之爲事。與餘之爲數。有相待者焉。又自然之勢也。是故欲庸率之長。必俟求傭者多。欲求傭者多。必俟通國歲入積蓄之益進。而歲入積蓄進者。國財舉多也。然則庸率之進退。與國財之增減。猶影響之於形聲。國財不增。而求庸率之進者。猶却行而求前也。

然有不可不辨者。庸之進退。不置其群之貧富。而以國財增長之舒疾爲差。故雖在至富之國。其力役之庸。不必侈。勃興之。其力富之群。其庸率爲最大。如徒以富厚言。則居今之時。一千七百七十三年。吾英自優於北美。顧在美之庸。乃遠過之。奴約郡中常庸日三先令六便士。在此爲二先令也。船匠日十先令六便士。益酒一升。值六便士。在此爲六先令六便士也。木作埽工日八先令。在此爲四先令六便士。

也。縫紉諸工，日五先令，在此爲二先令十便士也。凡此之庸，皆大過於在英之同業者。聞其地他部庸率皆不減奴約，且糧食諸物，在美者亦方英爲廉，卽有荒歉，不過出口者減耳。國中之奉，固恆足也。合二者而并觀之，則庸價既高，而泉幣之易權又大，其庸率之所優，不僅見諸其名而已。

故論北美既有之富厚，固不逮英，而其國方將之機，泉達火然，過英甚遠。庸之豐，齋端視此耳。今夫視國興耗，莫著明於戶口。不列顛三島之中，洎夫歐洲諸國，五百年以來，郡邑戶口，無自倍者。而北美諸部，則二十年或二十五年而已然。占黎之民，前者五十，轉瞬成百，不止此數。往往有之，勞力之民，食報最厚，生子過多。在他所或爲孳累，在此則爲富厚之資。一子長成，克膺析負，於其父母，與歲進百金同科。婦人少寡，挾四五兒者，在歐洲中戶之民，再醮不易。在此則爲奇貨，爭欲得之。人樂昏嫁，爲利添丁。故北美男女，什九早合，其孳乳寢多。既如是矣，然尙以丁單爲憾。蓋戶口之增疾矣，而母財之增尤疾。待闢之地尙多，求傭者常過於供。庸率之優，尙未艾也。

案北美人口一千八百七十年計三十八兆二十萬五千五百九十八而自六十八至七十八此十一年之中民之由歐赴美者歲約二十八萬三千七百六十人當斯密時每丁已值百鎊矣計今之值當不止此則美洲新民之集以財計之乃不異歲進三千萬鎊也即吾國閩粵之民歲至其地者當以千計盡力勤事方之歐民蓋有加焉以計學之道言之固於北美爲大利乃當道者徇歐民媚嫉之私時持驅逐華民之議而彼族之來吾土者乃日責徧地之通商此所謂公理私利兩無所取者矣

反是而觀則知國雖甚富而治不進者其小民力役之庸不能厚矣其積蓄未嘗不多其母財未嘗不廣顧但使地產通商歷數百千年而恆相若則所需勞力之民今昔無異斯役厄養供常過求且歲以益蕃終無劣求之日如是則雇者不待競而競者常在待雇之家無善價徠工之主而常有減庸白事之工即其初所受一身之外足贍其家而事勢遷流俄頃之間必倏然僅足自養其孱而後已此其事效觀之支

那可以見矣。夫支那五洲上腴，非所謂天府之國耶？民庶而非不勤，野廣而非未闢，特治不加進者幾數百千年。當蒙古爲君時，義大里人瑪可波羅嘗遊其國，歸而以事下獄。著書紀其耕桑之業，閭閻之形，其書見在。取以較今人遊記之所言，殆無少異。蓋其國之政法民風，遠在元代之前，富庶已極其量，而後則循常襲故，無所加前。且諸家紀述，踏跋多有，獨至指工庸之儉薄，閭生計之多艱，則如出一人之口。田事之傭，猝中爬土，日出而作，晚歸得米，鼓腹酣歌，已爲至足。至於雜作傭工，則方此猶劣。歐洲之傭，居肆待事，人有雇者，就而呼之，而支那之傭，則負載作具，行唱於塗，勾人賃雇。蓋支那小民，其顛連窮厄，雖歐洲極貧之國所未嘗聞也。粵東附郭窮黎，率舟作屋，不下數千萬家，名曰蜆戶，其生事至微，有西人船至，則環船而伺，幸其棄殘江中，爭相撈食，狗齧貓脂，半敗生蛆，苟得分沾，即同異味嫁娶無節，而好孕惡育，例不舉兒，都會棄孩，每夕多有，或以溺殺，如豚犬然。此天下至極殘忍之事，而其國有公操其業以爲生者。

案斯密氏之後數十年英國計學家有馬羅達者考戶口蕃息之理著論謂衣食無虧至緩之率二十五年自倍而地產養人者其進率不能如是大抵民物之進率用遞乘級數（如二四八十六是）地產之進率用遞加級數（如一二三四五是）且地產之進有限而民物之蕃無窮故地之養人其勢必屈而不有新地可以移民則兵饑疾疫之禍殆無可逃其論初出大爲歐洲所驚歎以爲得未曾有雖不喜其說者亦無以窮之至達爾文斯賓塞爾諸家興其說始稍變然而未盡廢也今觀斯密氏此所云云則已爲馬羅達導其先路矣

然而支那之治雖不進尙未退也何以知之其中府州縣之民尙無流亡他徙者已耕之地仍歲而耕則力役之事仍歲相若而所斥以養此力役之財亦仍歲相若雖最賤之民極貧之工必有所資以嫁娶生子者否則其種將盡而不能如是之積穰也明矣

假使其治退行致所斥以養力役之財日以見少則傭工所養之受雇者歲希上工

失業降爲中工。中工失業降爲下工。下工之爲生既蹙矣。而上中者又降而奪其業。則競於得業。減庸爲售。其事勢之流。不成至苦極薄之備不止。如是而猶不可得。則弱者必爲行乞。強者必爲盜賊。闔閭行旅。始騷然矣。飢寒之所夭。刑罰之所加。暴君豪子之所侵奪。死喪疾疫之所耘鋤。始之下民。地及中戶。草薶禽獮。轉徙流離。馴至子遺之民。與子遺之財相給。而後稍衰歇耳。此今印度之孟加拉與英屬之餘部。大較然也。彼皆沃壤。其地著戶口。亦前耗而非甚稠。夫以少民而居腴土。然而饑孺之數。歲告三四十萬人者。則母財之日絀。不足以振窮黎。贍功役。灼然可知矣。今夫東印之與北美。二土皆英藩也。而民生之彫瘵靡異。不同如是。無他。一則新民屯聚。公立法度以相保持。一則阻僑公司。陵遺利而陵轢土著。事驗顯然。難以掩諱者矣。

案中土舊說。崇儉素。教止足。故下民飲食。雖極菲薄。其心甘之。而未嘗以爲不足也。此誠古處。然計學家言。民食愈菲者。其國愈易饑。蓋藏雖裕。業作雖勸。無益也。歐洲諸國。如比利時。如蘇格蘭山邑。如愛爾蘭。其民皆極勤儉。不嫌菲食。以著積

爲糧然常被荒饑法英之小民最奢無遠慮貧乏則家有之而自宋元以來其國未嘗患饑饉印度民食資米與中國同他嘉穀不常食酒肉待歲時而後具故偏災歲告也

是故察國財之進退莫著於勞力者之庸庸優者進庸劣者不前至於國有飢饉之備其國財斯日退矣此誠必至之符自然之驗也

若即英之一國而言則今者勞力之庸其寬綽有餘乃不僅贖其一身一家已也前謂最下之庸必倍其一身之養而後可今欲明吾英通國之備所得之不止如是必特籌祿考物值以求之於疑似之間也即其顯然可見之數事而參伍之夫已釐然可決已英國常庸冬夏殊大抵夏貴而冬賤而貧家冬日以薪炭爲大費故生事所仰冬逾於夏乃勞力者之所得當其用省而轉優由是知庸之贖工不僅如其所費爲定率矣或謂廩之雖如是而彼小民方將節夏日之所盈以待冬日之不足挹多注寡通一年爲計或僅足而無餘然而僮奴最殷之庸其廩之不如是僮奴之食

常視當日所需以爲支放。以此知雇賃之庸不止於僅贖兩身者一也。

英之常庸不隨糧食爲貴賤。糧食之價年月而殊。而國中諸部庸率多數十年無變者。使小民之身家際其貴而不乏。則當平歲已舒。逢穰年稱饒衍矣。吾國已往十年糧食皆貴。而諸部雇役未聞數減。亦未聞價增。即或一二有之。乃緣興事需功。不爲貴糧增率。此以知雇賃之庸不止於僅贖兩身者二也。

案庸不隨糧食爲貴賤。此乃要例。不僅在英爲然。主護商者多疑之。以其不知凡物貴賤。全由供求相劑之所爲耳。每聞人言中國工廉。由於食賤。其受病於主護商法正同也。

年與年言。則糧價之變多。而庸率之變寡。郡與郡較。則糧價之變寡。而庸率之變多。今以麴麴（廣雅麴麴謂之麴。方言凡以火乾五穀之類。關西隴翼以往謂之饅秦晉之間。或謂之熬。熬與麴同。鄭注。蓬人云。飽者於稻室熬乾之。此與西人之作饅頭同事。且其名與西音甚近。今取以名之焉。）及膜脯（說文。膜脯也。南史孔靖飲宋

高祖無膠取伏雞卵爲肴又說文膾腩肉也周官膳夫鄭注膳牲肉也今取以譯屠肆諸肉之字一之價全國之中不大相過如此二物與凡日用零售之倫都邑之價方之鄉鄙或等或賤未嘗貴也而賃傭之價則通都之過郊野者常四五分之一倫敦庸率日十八便士爲常而數十里以外則日十四五便士而已額丁白拉庸率日十便士爲常而數十里以外則日八便士而已夫以地而言咫尺之間價之不均如此使在貨物則雖千里萬里而遠將有挹注轉輸之事獨至傭工乃不能移處賤就貴於數十里之間人之安土重遷有如是者然此不具論論者見小民之力役處賤所苟有以贍身家則處貴所之宛爾有餘不待辨矣此以知雇賃之庸不止於僅贍兩身者三也

案斯密氏言此之時英國之鐵軌未興也即國中道途亦不甚治故物與傭之價皆參差如此至鐵軌大興通國人物皆如水矣豈惟一國而已全地之中互相挹注不然則美非澳三洲之新壤何以資焉至小民之安土不必其天性然也墳墓

親戚之愛既有牽乎其心而言語服習風俗刑教則尤爲阻力之大者是故悲憤鄉願樂土二者相與戰於心前勝則止後勝則移惟止與移均非無故碩鼠之害猛虎之苛所從來舊矣

庸無論以地言以時言皆不隨糧食爲貴賤既前證矣顧其事不止此乃常若與糧食相反爲貴賤者此又以地以時皆可得而證者矣

以地言之則不列顛之民食麥麥之產也蘇格蘭少而英倫多蘇常仰給於英故麥價在英賤而在蘇貴也然既轉於蘇矣使英產者與蘇產者美惡同則在市之價相若麥之美惡視同量者作麪之多寡而英麥之麪爲多故有時以量言英麥若貴者而以重言則英麥實賤也夫麥之爲價英賤蘇貴如此及觀乎二地之庸則反蘇賤而英貴然則使勞力受庸之小民居蘇而已給其居英者之爲優厚明矣蘇之小民貧者多罌雀麥以爲飯其食穀於英之貧民議者多以謂此蘇庸廉於英庸之故以此言理所謂倒果爲因犯名學一名學西名洛集克又名代額勒迪克乃明用思之

理立言之例別嫌疑設是非窮理之利器而正名之要術也明代李之芳嘗釋之其書名名理探今人稱曰辨學然辨不足以盡名學之事也一之屬禁者也甲乘車而乙徒步者以甲富而乙貧也非甲以乘車而富乙以徒步而貧也

以時言之則前去百年糧食之價無論在蘇在英皆視今爲稍貴且百年來糧食降賤不獨此島爲然歐洲諸國大凡如此其在法國尤有明徵夫糧食既古貴今賤如此而功力之庸則古少今多亦無疑義夫如是則勞力之民在昔既有以贖其身家居今之日乃爲優厚又以明矣此則合前而觀知吾國之備其勞力之所得不僅以兩身爲率者此其四矣

閒嘗考之當前棋時一斯密生世爲第十八棋一蘇格蘭庸率夏六便士而冬五便士總七日之所得約三先令此在北方山部及西岸諸島中至今尙有然者迤南則漸多今之庸率日八便士矣額丁白拉左近日乃十便士至一先令者間亦有之蓋由接壤交通人事旺盛之故如格拉斯高喀爾倫愛耳哈爾諸邑是已至英庸所以

久優於蘇者。亦緣南國農功製造商務之維新。方蘇爲早。事資人力。而工食遂以之日增。且自彼以還。庸率之遞增者甚大。特事繁地異。難以一切言也。其略可見者。則如當一千六百十四年。步兵口糧。日定八便士。兵餉如此。則常備日廩。可推而知。兵固自常備中來也。昔察理第二時。大執法海理。著論常備之家。六口爲率。夫婦而外。男女四人。其中能事事者二。幼而不事事亦二。七日之食。須十先令。而後給。通一年計。則二十六鎊也。且云此爲至賁之數。不及此者。非勾且查。海鉅公名人。其言固審諦可信者。又一千六百八十八年。政治家金古烈哥理言。通國常備之家。通而計之。經數戶不下三口半。歲須十五鎊。乃可自存。此其計數。若與海理異者。而其實則同。皆以二十便士爲小民每口七日之糧者也。金精會計。其能事爲同時名人所推服者。合二者而觀之。則知自彼迄今。通國備民。歲進歲費。二者皆遠過其初。雖多寡之數。地或不同。而概而論之。皆有所進。特不若今一二人言所進之多已耳。蓋小民之庸餉實率。本難精求。地同事同。其所得或此多而彼寡。不僅以備人之巧拙爲差。主

者寬審亦以異也。故論庸之事苟非定由國令則後之考者祇能取其經數而言但庸之高下有至理定勢行乎其中而生其不齊之效。強以法令一切整齊之者多見其逆理而敗也。

物有真值勞力者之優細貧富與真值有比例與市價無比例然則徒以所受之庸錢多寡而言於小民之生計尙未盡也。欲知小民生計之舒蹙必合其庸率與時物之貴賤而言之設如是言則吾傭生計日舒將愈可見蓋生計之舒蹙視日用資生之物得之者之易與難方其易得庸雖少無害方其難得庸雖多何利焉。吾英百年以來不僅麥之價日賤也實則凡貧民之所仰皆比例而日賤一餐之中異品略備如薯蕷今之價半五十年前者也。蘆菔芥菰前之種者用銀今之種者以末矣。園林所出價皆日低百年以前如蘋婆如蒜薤多由伏蘭德而來今自饒衍食既如此衣被械器亦然紡績之功日以益疾麻桌圓甌價日賤而物日良無衣之歎斯以免矣。銅鉛鐵錫地產日恆官中所資小費輒辦生事如此不亦易歟計今所貴於古者特

蠟鹽皮蠟與諸酒釀耳。其所以貴。賦稅爲之。願編戶齊民。需是有限。所貴者少。所廉者多。不足病也。每聞士夫相聚談語。皆以民生日蹙爲憂。咸論往者惡衣菲食。狹處卑宮。而民知足。今則不然。此其說之當理與否。姑勿與議。愈以見小民生事之優。不僮存庸率少多之際。時物饒衍。所利尤多。然則吾國之儲。所得者不止於兩身爲率。得此益明。是其五矣。

按於此五者。見當斯密氏時。英國民生之甚舒。雖至末年。一斯密於一千七百九十年卒。一法國民變。拿破侖出。牽動歐洲全局。英民亦被其災。百貨騰踊。然而富彊之業。猶日進也。至弼德爲相。其經國通商諸大政。皆遵用此書成算。自護商之法。既除。英之國財。如川方至矣。此計學家公論也。又五證之中。所及公例。皆精要者。如庸率不以費爲差。庸不隨糧食爲貴賤。地異庸殊。而糧食不必異價。民亦不必從之。而還。庸之高下。常與糧食之價相反。庸率不可以法強齊云云。皆成計學中建言矣。

吾英勞力之民其所以爲庸者不特非最下之事且日進而優此合一群之利害
論之所謂庸率進物價廉使小民居養日以發舒者固通國合群之利矣乃或議以
爲不然一羣之中自力田疇工泊乎咸獲備保勞力之民居其太半凡事利太半者
不能爲其全之害甚明不然必太半之民困苦怨咨焦然而生而後爲全群之利歟
必不然矣耕者績者造室居者皆出於此太半是有此太半而後群之中有飲食衣
服燕處也彼出食以食人爲衣以衣人造室居以居人而獨已於是三者必逼離單
陋而後可過斯已往則或憂之曰是侈靡過制而將馴致貧乏衰亂也使制而如是
亦可謂天下之至不平者矣且議者烏知是貧富之效固與其所憂者相反也耶
昏嫁之事因貧而難然不因貧而絕也至生子之量則若因貧賤而轉大嘗見蘇格
蘭山部婦人飢羸困苦併日而食連生二十餘乳爲常而高門之中美衣豐食反輒
童然不生卽或有之至於二三生意盡矣故嗣續艱難在富貴爲至常在貧苦爲罕
觀意者安肆優厚之中其使人驚心縱樂有餘而生生之機轉由是而斷歟

貧乏之生雖無害於孕毓。然最不利於長成人種。初生至爲孱弱。譬諸弱草柔萌。苗於氣寒壤瘠之區。其殖孳蒔蕢。可立待也。前所連生二十餘乳。望存活者。不外兩雛。有軍官久於其地者。嘗爲余言。舊法。以本隊孤兒。彌補缺額。乃常不能。但籍爲笳鼓手。亦不能足。營中兵生小兒至多。然未至十四五。殤過半矣。或不及四週而殤。或七齡而殤。而過十齡者。則尤少也。此以見弱穉鞠子之難。無他。坐不能如富者撫視之周耳。是以貧民辟舍。其孽乳雖較富者爲易而多。而茁壯長成。則較富者遠不逮。至於國家卹孤之局。教會育嬰之堂。其殤率視貧家自哺之兒。爲尤大也。

案天演家謂孳生易則長成難。長成多則孳生少。乃生物公例。不僅在人爲然。至於動植。莫不如此。魚子之出也。大魚以爲糧。長成最不易。故物之多子。莫魚若。生品漸上。其多少相劑。大較如例。虎象生無不成。其孕毓方之他獸爲寡矣。至於人類。智下者生多而成丁少。智上者其成彌信。其生彌珍。斯賓塞爾論民生。謂到治之時。無過庶之患者。以此。斯密不識天演學。然其所論。與前例有相發明者矣。

一 讀書院白
生物之蕃與資生之物爲正比例。故生之量以資生之量爲界。吟也。文物之群苦資生之儉。至生以不蕃者。下戶則如是耳。而所以狹隘其生者。即在此易孳生而難長成之事。

案生之量以資生之量爲界。吟。然此界群有不同。饒野蠢愚之民。以度日不死最下之食爲界。必至饑饉。其生始屈。文明之群。民習於豐給。則其界略高。不待饑饉。生機已狹。

功力之食。報日優。斯小民孳生之界。域日擴。蓋庸厚而家計充。所以撫育男女者。周而天塲之數寡也。由此觀之。則此界之廣狹。亦視乎力役供求相劑之間已耳。何以明之。今使求儲者多。而供儲者少。則庸率必進。庸率進而小民之生計舒。生計舒而蓄家厚。蓄家厚則子之長成者多。小民之長成者多。則力役之供數有以與其求之數相副矣。相副而不止。則供乃過求。供苟過求。庸率又減。庸率減而小民孳生之界又狹。平陂往復。皆莫之爲而自巳者也。故勞力之衆。人也。而供求相劑之理。行乎其

中與百貨無以異。民生彫盛。胥視此已。天下之國莫不然也。見於北美。見於歐洲。見於支那。於北美則使之戶口年月自倍。於歐洲則使之離進而不驟。於支那則使之凝然無所盈虛。皆此例之行也。

力役有僮奴賃傭之異。賃傭者雇役也。計功受廩。自由者也。僮奴者身屬主人。分同牛馬。不自由者也。以勞力者人品之不同。而功實亦異。或曰體力之虧耗。在僮奴則所損者主人當之。在賃傭則傭者自當之。故奴工費不知徒以虧耗言。則在奴在傭所損者均主人受之也。蓋自其究竟言之。則或進或退。或中立。惟其時而勞力之受庸。必足贍其生與遺育其種類。以使供求相副。則主者當出庸之頃。固已合其所虧耗之體力而彌之矣。傭又安能無所出而獨當其損耶。故曰損者均主人受之也。然則奴功傭功。廉費等乎。曰否。奴之功固費於傭也。所損者雖同出於主人。然在奴則飼者主而食者奴。二者不相關通。而必多糜濫。在傭則主廩而傭者自飼而自食之。利於贏得。故有節而不糜。均之彌體力所虧耗也。前則主者爲之而虛。後則傭自爲

之而實。而利害則終歸於主人。故曰奴之功費於傭也。是以古今諸國。驗於終事。皆曉然於僮奴之功。比諸賃傭爲費。直至今日。北美如保斯敦。奴約。非勒德爾。非亞諸部。雇庸極貴。猶較奴功之所費爲廉也。視已成事。愈以明矣。

案此謂在奴在傭。損均主受。理最諦審。於後賢大力常住之理。幾所先獲。聰明精銳。先覺之亞也。然於奴功之費未盡。今爲益之。奴功之所以費於賃傭者。蓋食不視功爲升降。則其心無所顧藉。一也。習爲潦倒。與之器則易毀。與之畜則易斃。二也。傭之多寡。主者得以市之盛衰節也。而畜傭指者不能。三也。功必不精。出貨多。四也。無所取於巧捷。苟以度時。在奴則同。於主則費。五也。凡此皆其所以費之故。斯密豈以其易知而置弗論耶。然奴功亦有時而便。如在西印古巴諸所。地氣煩溽。雇傭極貴。而所產者乃粗品。如菸蔗諸物。而地又極腴。不患其傷地力。夫而後奴可用也。

然則勞力者食報之優。爲國財日進之果。而卽爲戶口繁庶之因。因果相生。自然之

效彼以力庸饒厚起風俗侈靡之憂者所謂哀生悼禍不辭之人也

雖然民生之驕虞也不在既衍既饒之後而在將安將樂之時故一群之盛與進爲期既止斯憂退則爲病此不僅小民所歷之境然也自君公以訖庶人心之爲用莫不如此當其乍進不必若已止者之多也而以樂及其既止常比方進者過也而以憂知此者可與擾民可與規國

惟庸率進而後生齒蕃亦惟庸率進而民生愈勤既稟稱事百工乃來故庸厚所以獎勵亦既獎而其勤益至衣食饒裕體力自完民常有更上之一境在其想望之中冀晚節衰頹得優游於落足斯筋力奮而樂事不疲矣是故庸優之國其民勗力最捷給最不倦庸劣者不能也觀英蘇二國之異與都邑邊鄙之不同則庸之勗功可以見矣夫謂皆窳之民七日之糧以四日勤之而可得則餘三將不事事而坐食此固國而有之然不概見也每見賃工之傭其成貨以件論售而得善價則早夜矻矻力作不自休如是數年而體力大損故倫敦及他都會木作極力治業常法八年而

衰他作價高而貨以件售者其效同此百工之事過勞皆致專疾往義大里名醫刺穆精尼嘗著書論之名曰百工專證小民逐利則忘勞不其見歟即如營卒額兵著號驟懶至爲利陰賊則亦不爾嘗有工程計物授值則軍官於發工之時須與領者爲約每日所獲至多不得過若干否則務得食多相競趨工過勞成損然則利之所在本無惜民又可見已前指惰工四日作勞餘三不事詳究所以亦多由前四之中努力而過遂使餘日不得不休蓋業無論勞力勞心假其勤苦連日以常人體力當之例非將息不可其不能者坐牽牽抑勒故耳否則無不暫息以游勞而思息生理自然乃不自由不關欲否甚且徒息不足須與自恣酣嬉以蘇既困使精神既憊尙然自勉或爲人所牽輕則生疾重且致死此逐利忘身之民數稔之間竟成痿廢不僅一二棄然也故使雇傭之主爲仁智之人則不惟束縛馳驟所不爲也將且以寬舒不偏爲程不知者以爲損利失計而知計之士則恬悅游和緩使從事者精力充裕無作輟之虞往往工堅事良其得利方之操券者常日計不足而歲校有餘也

按自斯密氏此言出而英國議院著律名廠令傭者操作每禮拜不得過五十二小時而傭主交利自是以來各國大抵著廠令矣英民業時最少而光緒二十三年業機器者尙求減功作時刻不得則罷工爭之其民之惜力如此小民耐勞之量國有等差炎方諸國最下而溫帶諸民歐不及亞中國操工小民夜以繼日幾無休時西國七日一輟業中國並此無有其勤可謂至極使待西民而然不終日譁矣然英民常自謂其功能以少時勝人多時其英法諸國之差經計學家爲之參較見謂所稱不誣至歐洲支那功力之差未經較驗未知何如是在後之留心圖計民莫者

又案民之所以爲仁若登爲不仁若崩而治化之所難進者分義利爲二者害之也孟子曰亦有仁義而已矣何必曰利董生曰正誼不謀利明道不計功秦東西之舊教莫不分義利爲二塗此其用意至美然而於化於道皆淺幾率天下禍仁義矣自天演學興而後非誼不利非道無功之理洞若觀火而計學之論爲之先

聲焉。斯密之言。其一事耳。嘗謂天下有淺夫。有昏子。而無真小人。何則。小人之見。不出乎利。然使其規長久真實之利。則不與君子同術焉。固不可矣。人品之下。至於穿窬極矣。朝撓金而夕敗露。取後此凡所得應享之利而易之。此而爲利。則何者爲害邪。此其爲道。不以淺夫昏子之利爲利矣。亦不以苛刻自敦濫施妄與者之義爲義。以其無所利也。庶幾義利合。民樂從善。而治化之進不遠歟。嗚呼。此計學家最偉之功也。

或曰。富歲多賴。則儲民好逸。儉歲艱食。則儲民差勤。故富足者惰之媒。而荒歉者勤之厲也。此似是實非之說也。夫曰幸遇豐稔。而勞力者或思自逸。此其說誠有然者。然不可以一概論也。且若謂頗頌之民。耐勞過於飽食。虞憂之子。趨事勇於懼忻。疾病羸弱者之操作。比諸茁壯豐碩者爲殷也。則其言什八九謬矣。饑饉連年。癘疫流亡。相因而起。國財以耗。物產以衰。更不絕書。大地歲有此誠。斷然可知者也。

然而彼之所以云然者。亦自有故。蓋豐稔之年。穀食廉平。儲者皆欲舍儲而爲主。自

致其力以爲益多。而又以豐稔之故。養工之母財日充。與事者衆。出穀之農。欲多出以敵其賤。如是則雇傭之主彌多。而爲傭民。則與往年相若。求者過供。此豐稔之年。庸率之所以進而傭賤也。至凶歉之歲。其事反此。生事既艱。立肆坐列。利入難而不可必。故前之欲舍傭爲主者。乃今思舍主而爲傭。而穀價翔騰。養工母財。與也見多。今也見少。雇傭之業。或輟或減。如是則傭荒。自食之工。蓋藏漸盡。則降而爲受庾之工。求不及供。此凶歉之歲。庸率之所以退而傭馴也。斥財之主。見後之傭索食微而易於約束。前之傭責償吝而不帖帖也。則曰富歲之傭好逸。而凶歲之傭差勤矣。然此何異。即蹄涔之微。而論大海之注洩乎。且養傭多者。大抵農頭田主之家。農頭之贏。田主之租。皆土物也。其利視糧食之騰跌爲進退。年饑穀貴。於傭爲病者。於彼則爲利也。其樂歎歲固然。而以是律傭之勤惰。則幾與事實相反者矣。蓋凶年多受雇之傭。而富歲多自業之工。謂彼在凶年則勤。在富歲則惰者。無異謂常人之情。爲己不力而爲人過也。夫豈然哉。大抵自食之工。較之雇傭。其勤倍蓰。蓋一則獨享

所其出之實。一則有主者爲之分。且廩食之工。群傭雜處。一傭倍寢。衆乃效尤。自食之工。則無此患。受雇者以年月爲論。時同廩均。勤惰之効。無以爲異。此以比自食之業。尺寸利害皆所身受者。息奮相懸。豈待論哉。惟富歲則自食之工多。而凶年則受雇之傭衆。故以通國之財爲論。富歲民之出力成貨宏。凶年民之出力成貨狹也。曩法國作家梅山斯。學博而詞辨。因受森得田歲計著論。小民出力成貨。富歲多於凶年之理。一梅山斯書名倭維恩理安。鄂盧恩三部戶口考。成於乾隆三十一年。以近部三廠簿張。每年所產之多寡。盈不足爲據。三廠者。額爾白弗。麗業。與鄂盧恩之麻絲二業也。三廠爲其地生計大宗。歲之所登。官有簿錄。於此見小民出力成貨。數與值皆以豐歲爲優。歉歲爲紉。愈豐稔愈多。最歉耗最少。而積年爲計。則豐歲所盈。正與歉歲所不足者相劑。補短絕長。其業爲無進退也。

至英國工業。則與此異。如蘇格蘭之麻業。約克沙之氈業。雖歲有出入。而都凡爲言。皆爲方進滋大之基。至稽其簿張。則若與年時續歟。有不相關然者。當一千七百四

十年北地歲大歉收二業所出誠皆不旺而一千七百五十六年歲亦大損乃蘇之麻業出貨甚多約克沙氈屬自一千七百五十五年至一千七百六十六年所出者皆不旺而歲減至北美印花稅罷徵而後其業大振蓋自是以來其出貨歲有進境也。

由此觀之則知凡懋遷廣遠之國中製造諸工之衰旺視所與通之國之事勢爲多而視本土之年時饑穰者爲少戰爭之起滅同業爲競者之廢興與夫銷產之民之所欣厭胥視此矣且欲定一地物產之盛衰卽官私簿張亦不足盡之也蓋其所漏者多矣今如力作之民或去其主者而自立紡績女紅歸其父母業焉以衣被其家自食之儲其成貨不必皆斥之於市也或以資其身或爲里鄰之所雇畜凡此之倫皆簿錄所不能盡也而言計學者往往據之以定物產之數考天下之盈虛則其去真遠矣。

前謂庸不隨糧食爲貴賤且常與其價相反以爲率者既云爾矣然以是之故輒謂

糧食之價與庸率絕不相關。則大不可。蓋儲功之市價。自以二者爲轉移。求儲者之多寡。一也。糧食之貴賤。二也。求儲者之數。或進或退。或中立。則儲者之數。亦或進或退。或中立。以與之相劑。夫如是。則儲者之所以爲養定矣。所以爲養定。故儲之市價定。何則。彼固得此。以市夫糧食者也。故有時糧食甚賤。而庸率猶昂。則知使求儲之急。無變乎前。而糧食乃不賤而貴者。則庸率之昂。益無藝矣。

歲驟積。求儲多。歲驟歉。求儲減。由是而庸進庸退焉。蓋歲驟積。積貯盈。足以食多。儲過常數。而儲之數不能驟進也。則斥財之主。相與出厚庸以徠之。所以進也。歲驟歉者。反是。蓋藏罄。小民失業多。急受雇。而母財見減。不足以盡食之也。則勞力之民。相與減庸以求之。所以退也。英國當一千七百四十年。歲海饑。儲者求食而已。不望餘也。其翌年歲大有。不僅庸貴。且難得焉。是故最而論之。庸之高下。其所以經緯之者。有二因焉。歲歉求少。庸之勢退矣。而穀食之貴。又使之務增。積歲求多。庸之勢進矣。而穀食之賤。又使之可減。故常時一國之中。功力庸率。經久無變。意者歲積歲歉。一

進一退之間。是二因者。常隱然相劑以折其中云爾。

案二因並用。而視前因爲多。庸率久無變。其因不止於二者之相劑也。

物合三而成價。故庸長則價不能不騰。然供者之價騰。則求者之數損。其損之程。視騰之度。此相因必至之效也。雖然。庸之所以能長者。爲斥以養力役者之母財多也。而母財既多。又將使出母者常欲大生財之能事。用之益巧。爲之益疾。其所資之功力彌少。其收成之物產彌多。斥母既宏。雇傭既衆。王者得以部勒署置。或分功。或合力。用力等而得效多。且又將制爲機巧。資以善事而節力。此不僅一家一業然也。風會所趨。通國之中。莫不如此。惟手足衆。故功易以分。亦心智會而機易以創。古之需人十者。而今則一之。古之以年時成者。而今乃日之。庸固長也。而成貨之需力微。二者相抵。所贏實多。故庸日長而物價日廉。其能日偉。故不害奉生之優。其事日闢。故無有失業之嗟。化國之民。所以食豐用罔而力不屈者。胥由此耳。

案大生財能事者。計學最要之旨。故功力之廉費。必不可於庸率貴賤中求之。有

時庸率雖大其工實廉有時雖少實費亦其生財能事異耳能事大者庸率雖大何傷乎由來一貨之成其中必有最費之功制作之家所欲代以機器者亦於此爲最急此機成則物價之減者常無算化國之民其所以能操天下利權而非且暮所可奪者亦在此耳

篇九

釋贏

案前論合三成價出地者之所得爲租出力者之所得爲庸出財者之所得爲息然不曰租庸息而常曰租庸贏者蓋息者無所象而贏有所象也所象者何本財應得之息利一也出財經營事資督率督率之庸二也懲遷之事得失相半取得償失成保險費三也合是三者通名曰贏以一家之所獲故計學專論之而不分也

贏之厚薄庸之高下皆消息於國財之盛衰顧二者之所因同而其所以因者大異

約而言之則一正一反也。何言乎一正一反也。蓋功力之酬多乃有養必國財盛而後庸率高。而母本之斥少則竭之。故國財衰而後贏得厚也。鉅商壟買。視一業之利則爭發貯經營。以殖其貨。相競之餘。自然利減。此在一業之事然也。使國財盛而凡業皆有競者。則通國之贏率皆微矣。故曰斥母者之利害。其視國財與庸反也。夫欲求功力庸錢之通率雖。此不必廣遠也。就一時一地而計之。夫已難得其實矣。故前所謂庸率者。皆取其最多。都凡撫略以定之而已。至贏率則並此不能蓋。贏得之事。變動不居。即叩之本業之主。彼之贏進。歲率幾何。往往不能答也。其所待爲變。不僅價之高下而止。同業之盛衰。受貨者之舒急。水陸之險夷。國藏之隱露。凡此之倫。旁午萬端。皆能爲異。故其變不獨以年。且以月日。且以晷刻者也。大都廣國之中。欲取一時工商之贏利。通而估之。得其經數已難。至欲居今考古。跡變動之由。求進退之實。則其勢有斷斷不能者矣。

贏率之難知固然。然即貨貨者之息利而求之。反可以常得其大較也。第六篇之釋

三物也。曰息者。所以市用財之權者也。然則使用之者之利便。其所以市之者自厚。用之者之利遯。其所以市之者自薄。是故觀息之變。可以知贏之變。二者相爲消長者也。故曰。卽息利以權贏率。可常得其大較也。

顯理第八三十七年。禁貸取息者。歲百不得過十。西人言。息皆以歲。不以月。後仿此。一過者有刑。此以見先之不止此矣。義都活第六立。教會以通財取息爲不義。則悉取子錢之事而禁之。顯其令率不行。而民齎資子錢愈益重。顯理查白十三年。復申顯理之禁。於是什一爲通行制息矣。泊雅各第二十二年。更令歲百息八。察理第二復辟。更令歲百息六。后安十二年。更令歲百息五。至今國家雖有制息之令。然息非操枋者所能高下也。前令大抵息率先行於時。而後從而制之。中產勤業。然諾不侵之民。其出資財。率不過制。而自后安以來。都市通率。多不及歲百息五者。懋遷往還。以三零五或四或四零五爲常。而當美洲自立戰事。英國民債。則歲百息三也。

由此觀之。則知吾英自顯理第八以來。歲賦國財。如川方進。且載驟駸駸。降而彌疾。故其見於事驗者。功力之庸。率則世增。而發貯繁財。工商諸業之所收。則日以趨薄。案民之日富。其驗如此。庸則日升。贏則日降。皆母財日多。政理公平之效也。財退之群反是。

又案斯密氏謂贏率之少。以鉅商阻賣。觀一業之利。則爭出財爲之。競者既多。其利自減。此說未盡。贏率之日少。正坐國財日富。而斥以爲母者多也。蓋亦供求相劑之一事。故使國財富矣。而可與之業猶多。則庸贏二者。同時可以並大。(說見本篇下)如有時賦稅雖重。贏利仍多。理亦同此。至息率高下。則尤以供資之財多寡爲差。息者贏中之一分耳。其餘則爲商庸。爲保險。既爲商庸。其盈蝕自與前篇所持之理合。因競而減。斯爲確耳。

又案以令制息。斯密氏不以爲非。然既云息者。所以市用財之權。則息者乃價。凡價皆供求相劑之例之所爲。操枋者又烏能強定之耶。使國家設爲司市。取百貨

之市價而悉平之。如新莽之所爲。此其爲謬。雖愚夫知之。制息之令。何以異此。且制爲息令者。禁并兼者之賸利也。而不知必制之令。而後賸乃益深。蓋未令之先。重利不爲犯法。既令乃然。而利之所以重。坐資者急也。資者既急。不恤利之輕重。以得財爲愉快。貸者息輕則不肯爲。息重則犯刑憲。既犯之矣。則子錢之外。須益之以冒禁之保險。而後爲之。故其息愈重。而賸民益深也。主計者不知此。皆出於自然。故使理財。靡靡大亂也。斯密之後。英國有賓德門。嘗深論之。惜意同此。故咸同之間。制息之令皆廢。

廢居殖貨。在都會則需母多。在鄉鄙則需母少。需母既多。而多財者相與競於其業。故贏得之厚。都會不及鄉鄙也。願力役之庸。則都會過於鄉鄙。處輻湊之區。積畜饒衍。治生者求力作之儲。若弗及。則厚其餽廩以徠之。庸之厚者。贏之薄也。至於鄙遠之區。其勢反是。見財無多。而傭作者充斥。求雇若不及。則劣其價以爭之。庸之劣者。贏之優也。

凡此皆驗諸各國而可知者也。蘇格蘭制息與英國同，而民所用以資貸者，其率方英爲大。雖信義素著之家，其貸息歲百不下五也。額丁白拉版克（版克此云銀號）又曰票號曰兌局曰錢店，其實皆版克也。所不當云銀號者，以其業不僅銀所不當云鈔局者，以其事之異古而票號諸名又嫌不典，不若直譯其音之爲當也。鈔則當云紙幣，此書所譯間用雜出，取讀者易明而已。歐洲版克之業，中古創於義大里國，蓋其民寄存積蓄之所，其字義與隄岸通，蓋其業相聚而周防有類江湖之壘堰，故異物同名耳。受人困財，割券以與主者，約隨時取，計日起息，猶百而四。此在倫敦名長流國，無所息也。諸坐列販貨，在蘇需財，皆劣於英，則蘇之贏率，過英明矣。至於二地庸率，高下已前及之。蓋蘇之於英，不僅貧富迥殊，即向富之機，亦英殷而蘇緩，故見諸諸庸庸者不同如此。

案英蘇二島（海汶中斷，綴以蜂腰，故可名二島）以其土沃瘠之不一，貧富初懸若此，而至今日，乃幾相埒。此其民之勤奮善計實爲之。斯密亞丹及他計學家

如穆勒父（雅各）子（約翰）如馬格樂數十百家皆蘇人也。可以見矣。然亦有術。康雍之間。蘇格蘭始設版克。造賒貸法。民大便之。國以日富。一千八百年以前。蘇之賦稅皆不充度支。自一千七百年來。歲有進步。今與英法諸國侔矣。故論者謂蘇格蘭處荒寒絕外之地。土瘠而民悍。幾於野蠻。一二百年之間。所進如是之無限者。學校版克二者制善。使之然也。案賒貸法者。版克出財以貸民。使民勤而貧者。資以爲母。民欲資則聯數家有力者爲之公保。至少無下二人。名保誠。保誠定所賒之數。常法自百鎊至千鎊爲率。議定。乃恣出入。歲終計息納之。而保誠有禁予縱縮之權。若貧者見不能。若惰佚。則止勿賒貸。如是。故其民之力有所資。而爭自奮於業。爲勤良。蓋富而有教之效矣。其法與新莽之賒貸。北宋之青苗錢無稍異。異者。彼民自爲之。而莽與宋。則以官筦其收發而已。目論之士。至今言青苗。無不疾首痛絕之者。而不知其行法非。而法之良。意之美。則無可議也。

法蘭西之制息也。與英異。上以意爲升降。不從市息之後而制之也。一千七百二十

年減五分爲二分一千七百二十四年復加爲三分五釐其明年更加爲五分至一千七百六十六年相制維第當國則減爲四分神市總纂續稿復舊法爲五分或謂其息率驟減之故乃爲國債還息道地考法史記誠有然者其制息或減於英其市息則往往而過蓋以國財論法富固不及英而資貸之際必與法相通故市息常過制老於行賈者嘗爲余言斥母遂利在法難於英其遠故雖法俗以懋還爲汗處英人以久賈相一而英賈樂居法有山然矣至於力役之庸法之遜英納需財賄蘇英之遜法常言遊者山蘇而英親見兩國之民容飾居養雍容纖綺之不同則問閭賁儉之異顯然可識今使其山法而復英則相去之度滋遠矣夫法之物博地大閭容幾蘇而民生不優者蘇進而法不進故也豈惟不進退者殆十八九乎此其言未必皆有據依而致此之云詎無耶今便有客寓蘇二三十年必不曰蘇所問誤也荷蘭國財若取土地之廣去戶口之數合而時之則方英爲富故其國家借民債常率二分民間交賃信義是倚者三分而已比歐諸國皆微獨至力役稅率則方英

其優以其贏得微薄之。或遂謂荷蘭商務。而食其此。一二業云然。則尙可信。若謂通國商業皆然。則恐正違事實耳。以計學公例言之。庸以贏薄之效。必非國財日退之國所能有也。大抵當贏率減減之時。彼殖殖實之家。易言生計衰歇。不知其率皆薄。正國財日益之明徵。又以見業廣同則斥母日恢之實也。轉近英法紛爭法之懋遷幾盡歸荷。後雖事平。其大分荷猶主之。英法國債出口。何人者至多。其在英者云四十兆。一自注云此數恐太過實。一民私費。數復不費。大抵諸國息率高者。荷財皆往出。合統此數端。足見荷蘭國財之充盈。國中業隨母因息率放薄。不然其財不出國也。譬諸私家之富。用一業與財口以用。過其所需之計。增益從事。贏率數微。自用有餘。乃以出貸。然其商業則方盛未艾也。大國母財口充。正如此耳。

案今之英美諸國。皆加優贏劣。而中國反此。彼之通我。最爲得利。此所以海禁既開。自西徂東。日盛月。雖鐵。湯池。不能阻也。而我出力求加之。亦無海。如新舊金山者。勢亦日多。美人恐其儲奪其小民之生。乃道天下。不公之。以

拒華備。故至今在美者不過十餘萬衆。使不爲此。一任事勢之自然。則益充斥無疑也。凡此皆計學公例之行而不可過者也。

若夫美洲中北部之英屬。其力庸財息皆優於英。息優則贏亦優矣。其息率或制息或市息。皆自六分至八分。無更下者。夫力庸與財息並優。乃人間至不數觀之事。觀者獨新墾之地耳。蓋新墾之地。土廣民稀。積畜始有。故其母財不足以副事。其力役又不足以副其母財。必多歷年。始能免此。故其初占之田。必擇壤埴最腴。轉輸最便之地。或連海濱。或緣江介。以利漕轉。兼資溉田。又新墾之地。其值必廉。聽人自占。價不抵殖。且處女之壤。產力至優。略施治闢。所收億秬。母財贏率自然過當。雖山重息賁之。不虧折也。其收利之疾且優如此。故其積畜。轉瞬豐稠。乃欲增雇傭作。而傭者之來。或不能如是之速也。町畦多而手指少。則其酬之也不得不厚。此庸率之所以日進也。至於拓地稍廣。移者降多。主者之贏。稍稍遜矣。蓋自壤埴最腴。轉輸最便之地。以次占闢。更占之所。稍不及前。贏率坐減。息率亦日趨平矣。故名英屬土之中百

年以來。息率之差。相去數倍。大抵國財日進。生齒日蕃。而分功日密。則稱貸之息日微。獨至勞力之庸。則不隨贏利爲減。何則。求儲之數。純以母財之多寡爲差。而與贏率之厚薄無涉也。且母財之進退。亦不以贏率之厚薄而殊。有時贏率甚薄。而全贏轉多。蓋贏薄而母多。方之贏厚而母少者。所收常過。此在戮力治產之家然。而在勤奮率作之國。亦莫不然者也。若其國忽辟新疆。或所與通商者益廣。則雖國財日溢。贏率可以不減。而反增。贏率既進。則息率從之矣。人情逐利。必擇最優。當其疆土乍闢。而所通忽廣之秋。事業驟多。國財如故。財不周事。勢將棄劣而從優。謀新而舍舊。而舊者之母既收。則其業之爲競者少。其產入市。亦以無多。供少求同。價值自起。價值既起。贏利乃多。贏利多者。息率大也。故曰不減而反增也。輓近英倫戰事既平。私家貸貸。卽信託（熱實貌）業厚者。不在五分之一以下。而前此則四分五釐足矣。此反增之驗也。當此時。英於西印度。美利堅。拓土極大。民間新業繁興。息率不減而增。殆必由此。而非國財之損使之然也。蓋即使國財如故。而戰勝之後。開通國土。如是之

多民之移故就新正符前論至於戰事所費雖誠不貲而英之富厚不因而減此其徵驗吾得於後篇及之

母財所以養工故母財消則庸率減雖然庸率減矣而贏率則以增也贏增則息亦增矣蓋自庸率減而工價廉故成貨之本不鉅亦自母財消而供者少故入市之價以騰本輕價騰兼贏兩利雖以重息貸母不折閱也故息率大焉印度孟加拉部之公司與他泰東新步之懋遷其贏得之至優可以證此東方多彫敝之國故其地皆贏利無藝而庸率至微息乃比例與之俱大孟加拉農民之舉債也歲百息四十至六十者有之且皆以秋成爲質夫能舉如是之債爲母而猶有贏則其贏之大可想見矣樹藝之業贏大則蔑租息大則所餘以爲督耕之庸者少此其事不僅印度然也羅馬未解紐時吏汙而并兼之家衆郡省息率之大大都如此布魯達有仁人之號者然顧克祿文紀其治塞布刺斯島時放債於民歲百息四十八則他可知已國富以其天時地利人事三者爲量使其量既充而中立則庸與贏可以並薄蓋其

於庸也。則極其幅員之廣狹。積畜之盈虛。而戶口之衆寡。與之相稱。既極其量。不可復加。而後民競於工。工競則庸之率終趨於至薄。其於贏也。則極其物產之耗穰。交通之廣狹。而母財之滯斥。與之相謀。安於守成。不爲維新。而後富者競於業。業競則贏之率終趨於至微。

問天下有如是之國乎。無有也。秦東之建國曰支那。支那富國也。既充其量矣乎。曰未也。何以知其未耶。曰支那之富。充其人事之量云爾。所不加進者。民智與其政法教俗同之也。支那國處溫帶。西北背山陸。而東南襟海。有長江大河。爲之釀通。形勝之國也。然其進於今治。而無所增長者。不知其幾何世矣。徒以其天時地利之量言之。支那之富厚。詎止是而已哉。嘗試論之。其俗以商賈爲汙穢。立海禁。醜與外國往來。西國之寶船交海中。一二口外。舉不得入。夫如是則懋遷不廣。而貨棄地者多矣。故曰未充其量也。且其政不均。豪強倚勢力以爲并兼。中賈以下。爲食吏之所睥睨。信義廢。其契約不足恃。赴愬於理。則所失益多。夫如是則國多滯財。所斥爲母者不

副其懋遷之量。然而其國大商賈之贏利。尙爲不薄者。則何也。有力者侵牟小民。立率權而罔市利故也。觀其國之息率。齋資子錢者。歲百息十二爲常。其贏之尙厚。可推求爾。顧其小民功力之庸。則最下之率矣。故曰支那之不加富。政治教俗固之也。夫政法不均。則其國之息率寡不重者。不必國財之豐。當爲之也。蓋息率之所以廉平。以假者之無不歸也。使政法不均。而上不爲其民責約。則富者以財貸人。常有不收之慮。以其約之不足深恃也。故其稱息也。必重信者之所酬。以償無信者之所不酬。須平息之外。益之保險之費。而後爲之。此政廊之羣所以無輕息也。羅馬末葉。日耳曼拂蘇峨特之族。蹂躪其西諸部。當此之時。契徹質劑之事。爲民自爲。渝者無罰。其子錢之重。皆今所不概見者。職是故耳。

法禁子錢。則無益而反損。蓋民既需財。而已無有。非資則不得財。非息則不得資。而貸者之爲此也。既有亡財之慮。復懷犯憲之憂。非有所償。固不貸也。償則務平息之餘。益以二者之保險費。而息愈不貴矣。歐東回民。子錢至重。法國政治家蒲特斯鳩

謂其弊由法禁子錢而契徹不信不盡由其國之貧也

廢居治生有得不能無失使九得而一失則於其九者通之必有以償此一失若爲保險費而猶有奇餘焉夫而後其業可爲也此之奇餘是謂實贏除之以十而與母相權百得幾分斯爲贏率其一役之所贏或多或少皆爲總贏總贏者兼所失而言之不分析也然使舉債斥母以治生其子錢息率則當與實贏作比例不當與總贏作比例也

故最下贏率必以有償虧折之失而有餘贏既如此息亦有然必有以補不歸之通而猶有獲夫而後曰贏曰息也使其不然友朋推解之情緩急相周之雅而非國人貸貸之事矣

案由此推之將不獨如前所言官不爲民責約則稱貸之息率大也每見官宰鵠突其理貿易倒荒之案輒袒通家而不察其有欺詐之情株連之累此之流極必至民不相任商賈不行動愿者失依巧僞者得計物大騰貴息利不倫而後已故

曰播種之仁所惠者小近而所禍者大遠豈不然哉

國之所病在多惰游而惰游之所以多坐食租衣稅仰子錢之家衆也今且無論租稅第言子錢之家則使國富充其量而不可加工商諸業之用毋皆至足而不可復多如是則其贏率必至薄而子錢之率從之且子錢之率既微則仰此以贖其身家者非至富饒固不足也夫如是則仰息之民寡而中產以降必舉其積蓄而自經營之冀以收兼庸之贏如此則風俗成而通國之民皆農工商賈矣礦磨世變增益不能而無逸居之飽食此其群之所以日蒸也今荷蘭之於諸邦最爲近此者矣過於生事東於國俗其民皆以無所經營而坐食爲恥譬諸衣然不能人皆短小距地而我獨大袍褰衣也又如習尚然居營營之中則不武而契需者爲笑情民之於勤國致亦猶此夫有迫而使奮者矣

物既合三以成價則必其一皆微而後其一獨鉅故贏利過厚則蔑租而製作與運致之庸亦薄然而庸雖薄尙不能盡無也暴君之發卒征徭必有粟焉以食其徒而

後舉不然廢矣。至於地主人之租則事勢不同。有時可以無有。揭羅屈閣大東公司其貿易贏得之厚。爲租庸皆至薄耳。

息率與實贏爲比例。而此比例之率。又與贏之厚薄爲消長。英賣常法。以倍息之贏爲平贏。假如資爲母。實贏之率。歲百得十。中去息利五分。其他五分。卽爲經營者之所得。以酬其服賈之勤。與其役財之冒險。願此之爲率。亦視其地通行贏率或過或不及之何如。使甚不及。則息家不必得半。抑或甚過。則所以酬息者固可從而多也。

國日富則贏減而庸增。庸增則貨價宜日騰。然以贏減之故。而貨價尙可以無騰。而以與他所庸賤者之所出。競爲售也。從來商賈製造之家。皆謂物產之所以騰踊難銷。由於庸長母多之故。此有見於人無見於已之說也。平情而論。則物之貴也。由於斥母之家實贏過厚者多。而由於傭工小民賣庸之優者少也。何以明之。蓋因庸爲加。一加而已。至於實贏之厚。則貨經數手。視母爲子。遞而求贏。後母大於前母。後贏

過於前贏。子母並增。故爲大也。因庸爲加。加以加法者也。因贏爲加。加以乘法者也。以代數術言之。前用加減級數者也。故其長微。後用乘除級數者也。故其積鉅。今試以竹布一貨言之。假其中漚凍紡績諸工。每日之庸。如增一便士。如是成貨。每匹之價。所長者不過計功作加工幾人。作幾日。成若干疋。每若干價。如是止耳。至於贏率之大。則不然。假以值百贏五爲率。今增三分。使之值百贏八。則出麻之農。計其成本。每百贏八。而售於漚工。彼亦計其成本。值百贏八。而售於凍工。如是而紡。如是而績。始之贏者。計母爲率。繼之贏者。併子入母。逐事遞增。以視彼庸。孰爲重乎。譬諸利息。前者簡息。後者繁息。一繁息者。至於息期合息入母。謂爲新母。以起息也。一故曰物值之貴。起於增庸者微。起於增贏者鉅。而商賈製造之家。不以云者。利與人則分明。利歸己則茫昧也。

案自斯密氏成書以來。計學家後起者有二大例焉。其關於民生治亂之源甚鉅。今譯以附於此篇之末。一曰馬羅達之戶口蓄息例。二曰理嘉圖之田租升降例。

二家皆英人。自其輸出。而計學之理益精密矣。馬羅達曰。戶口常法。二十年自倍。然而有不然者。食限之也。食限若何。可耕之田易盡也。夫曰可耕盡者。非田盡也。民日益庶。則必耕下則之田。其勞力費財同。而所收日寡。即田之肥磽無盡。亦必多費財力。而所收不能比例而增。且以益庶之故。壤之可耕者。靡不耕。母之可益者。靡不益。至於得不償勞而止。此所謂食之限也。而生齒之浸多。往往欲過此限。過則貧且亂焉。不及則安且治焉。蓄息之例如此。理嘉圖曰。當蓄息之日。趨於其限也。庸贏二率。亦以日薄。獨地之租率。則以日增。租之所以增者。以腴地耕盡。漸及瘠土故也。國中之民數加多。而母財日益。雖贏率稍薄。富者亦顯斥而爲之前。也費千金而收百石。今也費二千金而收百五十石。則後之千金。所取償者不外五十石已耳。且此既以千金五十石而可爲。則受田者以千金五十石爲率。過此之種。實以爲租。以與前人爲競。如是則往者費千金而收百石。今乃倍費而收百五十石。而其中五十石。乃租稅也。使彼不爲。則他人爲之。是通以千金收五十石。

也。而租率以之大進焉。凡國生齒愈繁。闢田愈下。殖量既差。名租遂異。故腴田之租日增也。一田之殖量視其壤之沃瘠。一也。視其處所之轉輸便否。二也。合之爲田之殖量。一田租升降之例如此。生事之難易。民物之盛衰。大抵此二例之行而已。顧此之專以田爲說者。蓋食者生事之大。舉大則例其餘。斯密氏生財三物。曰地。曰力。曰母財。地或曰業場。斯密氏此篇。斟酌於庸贏消長之間。其言民生所以因之爲舒戚者。可謂備矣。顧不兼業場而言。則猶未盡也。蓋不兼業場之廣狹而言之。則物產之所分。役財與出力二者。若常有相軋之勢。庸厚則贏薄。贏巨則庸微。不能兩利而俱存也。而有用力同用財同。在此則庸贏並劣。在彼則庸贏俱優者。無他。業場之廣狹異也。今若取母財力役業場三者優絀之間。較而論之。則民生不同。可分爲四境焉。一使其國母財富於力役。而業場甚廣。母財尙不足以盡之。如是者其庸贏並優。此美利堅之事然也。二使其國母財富於力役。而業場狹。則其庸率大而贏率微。此凡國兵燹饑凶之餘。每如此者。然以蓄息之例之行。此

境不能久也。三使其國母財不足養其力役而亦不副其業場則庸率至微而贏率至大。中國今日之事正如此。其在往日印度已然。故英人得之國以鉅富。四使其國母財不足養其力役而業場又狹不足盡其母財。如此者則庸贏並微。五十年以前荷蘭義大里皆如此矣。此地力母三物不同相互爲變之略也。又斯密氏之論世變也。分三際焉。曰進曰退曰中立。進者庸贏皆大。民生日蕃。中立則業場已盡而庸贏皆微。其民蹟困。至於退則不獨庸贏皆薄。且其民之受贏者將降而受庸而受庸者之數亦日以寡。其民流亡。此爲最下者矣。然三者之外尙有一境焉。業場固廣也。而戶口母財之進適與之齊。則庸贏不進。蓋業場雖日廣而母財亦日增。國固日富也。而贏率不加大。次則業場母財並多。而戶口歲增。與之相稱。如是者國亦日富也。而庸率亦進。蓋庸贏之變必三者有過不及而後形。且民情悅豫必遇進境而然。中立則憂退益顛沛。故使其三者俱大俱小。而無過不及之差。則所居之國雖誠日富。而其民殖財者可以幽憂。勞力者可以困殆。此又論世

變者所不可不知者也。抑更有進者。以一國之計而論之。則過庶患也。而過富亦憂。人但知過庶之爲患。不識過富之爲憂者。此不知計學者也。計學家以謂母財之與力役二物之判。在於過去即今之間。民前施筋力而積其收成之實。斯爲積畜。斥此以養後來之力役。則號母財。母財者。前積之力役也。故不僅現在之力役可以至於盈溢。即前積之力役。亦可過於饒衍也。現在之盈溢爲過庶。前積之饒衍爲過富。過庶者母財不足以養工。而庸率日減。過富者業場不足以周財。而贏率日微。庸率日減。則小民彫弊。戶口蕭條。贏率日微。則中產耗虧。閭閻愁歎。前之效私國民。後之效損國力。而其爲窮蹙之象。則均也。如今日西國之患。恆坐過富。母財歲進。而業場不增。故其謀國者之推廣業場爲第一要義。德意志并力於山左。法蘭西注意於南陸。而吳楚之間。則爲英人之禁樹。凡皆爲此一事而已。此其所以爲爭之情。與戰國諸雄與前代苦中國之戎虜大有異處。今之曰謀人國家者。所以不可不知計學也。